

東
華
續
錄

東華續錄

嘉慶九

臣王先謙敬編

臣周瀚蕃恭校

嘉慶五年庚申春正月甲寅朔 上啓鑾謁 裕陵○再免經過
地方額賦十分之三○丙辰 上謁 裕陵行初期祭禮○丁巳

上謁 昭西陵 孝陵 孝東陵 景陵復謁 裕陵回鑾○

戊午諭軍機大臣等此次高姓等四股賊匪竄入城固南鄭等處
止因川省無糧可掠希圖由漢江上游搶入甘境覓食陝省兵力
較單不能堵禦額勒登保酌量緩急機宜帶領兵勇卽由保甯廣
元一帶取道入陝不辭勞瘁力疾遠涉實堪嘉慰前因川匪竄入
甯沔一帶德楞泰相距不遠是以令其遠赴陝境堵剿今額勒登
保親自前往更爲得力川省各股賊匪卽責成德楞泰魁倫剿辦

魁倫係本省總督川境賊匪係伊分內應辦之事伊二人務當督率將弁分投截擊將冉添元徐添德等股以次殲除至川東賊匪專交七十五勦辦勿任東竄楚境其川北之通江南江一路賊匪專交朱射斗勦辦將此傳諭知之○庚申 上還京師○辛酉召保甯來京以松筠爲伊犁將軍仍留陝省幫辦勦賊事宜調長麟爲陝甘總督實授玉德閩浙總督阮元浙江巡撫轉戴衢亨爲戶部左侍郎調張若渟爲戶部右侍郎轉汪承霈爲工部左侍郎以蔣兆奎爲工部右侍郎前任漕運總督○命長麟馳往陝西會辦軍務○命慶成效力陝西軍營○壬戌諭軍機大臣等國家倉庫豈容稍虧若清查過急州縣借彌補爲名復有勸捐派累之事是爲民反成害民理財變爲聚斂朕深知此弊大抵州縣不畏上司盤查而畏後任接手近年則新舊聯絡不特任內未能彌補竟有本無虧

空反從庫中提出實從來未有之劾舉聞有一二清正大員又以
不辦爲積陰功殊不知保全一貪官害百萬生靈其損陰功大矣
百姓不可剝削倉庫不可虧損其如何從容彌補之法在督撫悉
心講求無欺無隱密奏章程候朕酌定○癸亥陳大文丁母憂以
蔣兆奎爲山東巡撫莫瞻菴爲工部右侍郎由內閣學士遷○兵部尙書
金士松卒子祭葬諡文簡○甲子以張若淳爲兵部尙書調周興
岱爲戶部右侍郎轉童鳳三爲吏部左侍郎調錢樾爲吏部右侍
郎轉曹城爲禮部左侍郎○丙寅命直省清釐積欠○以蔣日綸
爲禮部右侍郎劉涓爲左副都御史由大理寺卿遷○以聞嘉言爲太常
寺卿台斐音爲廣西布政使溫承惠爲陝西按察使由延榆綏道遷○己
巳撥部庫銀一百萬兩分備陝西甘肅軍需○辛未祈穀於上
帝恭舉 高宗純皇帝配享○諭前因明亮在陝省勦辦張漢潮

一股賊匪帶領多兵不能奮力殲除任其往來奔竄日久稽延於樂莊牧護關等處打仗情形又復奏報不實是以將伊革職拏問交大學士九卿嚴訊定罪但念明亮從前在西北兩路帶兵著有勦勞嗣於征勦大小金川曾任副將軍贊理軍務功成受賞辦理湖南苗匪亦係伊接辦蕝事勦辦湖北孝感邪匪亦能迅速殄除嗣又在陝境殲斃齊王氏姚之富二逆惟上年追勦張漢潮辦理遲延先經降旨將伊拏問明亮旋將張漢潮殲斃雖其餘匪冉學勝等尙未淨盡而那彥成等帶兵督勦僅在老林尾追徒疲兵力至今亦未痛加殲戮是辦理遲緩之罪不獨明亮一人爲然朕平心細取明亮功多罪少况係宿將必應保全至明亮在湖北得受餽遺訊明俱係犒賞兵丁並未入己卽兩次查伊家產貲財亦屬無多亦未有似永保於事後受賄之事罪不掩功非曲法示恩亦

非姑息明亮著加恩釋放賞給金頂領催前赴湖北竹谿一帶隨同松筠帶兵剿賊但係屢經獲罪之人本應自備資斧前往第恐行走不能迅速並著加恩准其馳驛伊到軍營後所有一切分例不准支給明亮經朕此次寬宥之後如能倍加威奮殲賊成功尙當加以懋賞若再不激發天良力圖報稱或仍以宿將自居不聽調度致有貽誤必當加倍治罪不能再爲曲宥矣○以倭什布不能辦賊召來京以姜晟爲湖廣總督祖之望爲湖南巡撫調莫瞻象爲刑部右侍郎蔣曰綸爲工部右侍郎以劉躍雲爲禮部右侍郎由大理寺卿遷○命松筠馳赴湖北督兵剿賊○壬申申禁沿海弁兵縱盜養奸○癸酉諭軍機大臣等從前楊錫綬在漕督任內辦理漕運一切章程俱屬妥善迄今數十年旗丁尙受其益聞伊於派委員弁催查漕運一節尤不肯輕易差委大率糧船開兌行走各

衛弁等故意鑽營派委差使藉催查之名沿途需索肆意苛求而旗丁之苦累已不可勝計是慎委漕弁亦剔除酒弊之一端鐵保惟當以楊錫紱之經理得宜爲法以富綱之貪婪勒索爲戒妥協辦理以副委任○甲戌復翰林編檢等官輪班引見例○庚辰論慶郡王永璘自幼蒙 穎貴太妃撫養見值 穎貴太妃七十壽辰備物申祝本屬誼所應有但必應在朕前先行奏明方可呈進今永璘竟不豫行陳奏輒令護衛太監等徑赴 壽康宮陳遞經 穎貴太妃處太監奏明朕始得知從前 孝聖憲皇后每遇萬壽慶辰如和親王果親王及內外臣工等備物申悃無不奏明 皇考始行呈進從未有擅自遞進者此時 穎貴太妃尤與 東朝尊養禮節懸殊乃永璘竟自令護衛太監遞進並不先奏朕知交結近侍之舊習復萌以此嘗試朕能知否朕不能知或知而不

問則故態復作矣再從前恭遇 皇考巡幸朕與成親王永理俱
謹隨 輦蹕不敢稍離而永璘則往往偷安行走落後竟不繫撤
袋直至 駕詣行宮時始隨班跟入今年朕恭詣 裕陵往還途
次留心察看永璘尙不知悛改仍復在後行走並不隨侍永璘前
在書房卽喜與太監等相近諸凡不知大體著退出乾清門並交
宗人府議處加恩仍留內廷行走隨同儀親王永璇等當差以觀
後效如再不知改悔則當退出內廷令隨同閒散諸王行走不能
全其顏面矣○緩徵教匪滋擾之甘肅隴西等十四廳州縣及西
固等二州同所屬並湖北竹山等各州縣春季額賦荊州等八州
縣衛通銀○撥部庫銀四十萬兩備湖北軍需○癸未江蘭以雲
南巡撫任內譚災奪職轉劉秉恬爲兵部左侍郎以陳萬全爲兵
部右侍郎

由內閣
學士遷

○是月兩廣總督吉慶奏蒙發回前次奏摺欽

率硃批以粟米布帛爲重不貴珍奇臣民敬聞俱深悅服臣惟有督率所屬實力奉行以仰副節用愛人至意得旨節用不但能養身並能養人上行下效其功立見朕向來治家以崇儉爲本今治天下不易此心惟望賢督撫佐成朕治共樂昇平百姓足則朕之願足矣家有蓋藏則朕之富大矣善體此意毋忽

二月甲申朔諭勒保前在雲貴總督任內勦辦犵苗歲功完善蒙皇考錫封侯爵嗣調任四川勦辦教匪因擒獲起事首逆王三槐復蒙皇考殊恩晉封公爵上年朕親政之初卽授勒保爲經略畀以事權冀其上緊辦賊迅速奏功乃勒保自任經略以後惟知安坐達州從未帶兵與賊接仗僅將各路打仗情形彙奏塞責毫無調度以致賊匪日久稽誅是以將勒保革職鞫問解京審訊勒保惟認遷延貽誤之罪無可置辨經軍機大臣會同刑部遵朕

前旨擬以斬候但念勒保前此辦理狎苗尙爲妥速至今黔省苗民甯帖其功實不可泯卽在川省辦理教匪曾擒首逆王三槐且其任經略時各路亦曾頻獲首犯雖非勒保帶兵擒捕究係伊所派調其罪止於安坐軍營一節竟似帶兵打仗非伊分內之事而各路勦賊處所又未能相度機宜隨時策應實屬大負委任然朕權衡功罪務在持平勒保尙可功罪相抵伊在任亦尙無營私等事著加恩釋放賞給藍翎侍衛帶兵贖罪本應令伊自備資斧前往但恐行走遲滯著加恩准其馳驛迅卽起程前往經略額勒登保軍營面商應赴何處勦賊卽行帶兵協勦伊見係領隊之員自當以打仗殺賊爲事若能將賊匪痛加殲戮或更有立功之處朕必加以恩擢勒保惟應倍加奮勉不但可贖前罪並可蓋伊父溫福之愆儻再不知感勵仍前玩誤卽當於軍營正法示眾不能屢

邀寬貸矣○諭軍機大臣等魁倫自接辦額勒登保軍務後輒因
檄調兵勇支給鹽糧料理衣履直至初八日方自達州起程以致
賊匪由墊江南竄魁倫始向合州一帶迎剿今合州之賊尙未移
動另有賊一股竄至定遠之石板沱地方搶渡嘉陵江西岸共計
不下萬人騎馬者並有千人是賊勢甚爲鴟張可見嘉陵江西戒
備空虛毫無防範魁倫所辦荒唐錯謬大負委任本應革職治罪
姑念其平日居心頗直辦事尙能認真暫從寬按去花翎革職留
任因見在帶兵觀瞻所繫著仍留頂帶以觀後效見在魁倫由鄰
水追勦務須曉諭民人協力堵禦魁倫惟當將此股竄匪卽在州
西定遠一帶悉數殲除卽使力有不敷亦應將賊匪逼回川東川
北併力合擊斷不可使之竄往西南擾及重慶及成都省城方爲
妥善○以賊匪擾及川西命德楞泰帶兵由廣元昭化赴川西會

同魁倫勦辦○乙酉諭軍機大臣等貴德番眾見大兵壓境卽畏懼投誠自應網開一面許其自新台費蔭等諭令出具甘結並退出搶去牲畜交還蒙古屬下人戶所辦皆是此時台費蔭等移兵前赴循化查辦該應野番如該處番賊亦能畏威懾服兵事便可完結但野番獷悍性成雖均知改悔難保其不仍蹈故轍必須蒙古王公等振作自衛方可絕其覬覦之心台費蔭等傳諭蒙古王公扎薩克等見在遠赴邊界勦辦番賊皆爲爾等勞師糜餉今野番旣將搶去人戶牲畜全數交還爾等必當剷除從前委靡積習力加振作於所設卡倫嚴爲守禦不可稍有疏懈並當體恤屬下使之各歸生計方不至再向外番勾結滋事如仍怯懦推諉不但不能再爲調兵辦理並將伊等治罪如此剴切曉諭庶蒙古王公扎薩克各知振作自衛不至爲野番滋擾○命明亮赴四川勦賊

○丁亥諭軍機大臣等徵縣兩當大股賊匪渡過渭河至隴州清水秦安境內滋擾那彥成由寶雞出棧趕赴隴州清水乘賊匪屯聚隴山鎮地方痛加殲戮僅從後尾追焉能得此勝仗可見行軍之道總在察探賊匪奔竄之路豫爲迎擊此時賊已分竄西和禮縣等處那彥成於秦隴一帶截住竄往東北之路而額勒登保由襄城入棧正可會合夾擊至那彥成旣與經略額勒登保同在甘省辦賊自應受其節制今那彥成自行懇請並稱和衷協力所見甚是前此軍營參贊原有二員明亮之缺將那彥成補授所有欽差大臣關防著移交經略額勒登保收存俟大功告竣與從前經略印信一併繳進又本日刑部擬湖北武童阮安國控案伊於從前教匪滋事時隨營效力曾經總兵賞給行營把總又經遊擊加賞千總勒保未經准行所辦尙是國家名器豈伊等所得擅行

濫賞嗣後各路軍營遇有出力兵勇惟經略及參贊得以酌量賞給頂帶仍行隨時具奏其餘帶兵各員不得擅自賞給以杜冒功濫賞之漸○戊子富綱以焚賊擬絞上改爲監候○以邵家壩漫口已合復決奪康基田職留河工效力調吳璥爲江南河道總督以王秉韜爲河東河道總督調馬慧裕爲河南布政使台斐音爲陝西布政使以李丹爲廣西布政使瑞亨爲山西按察使由甘肅道○調公弼爲廣西按察使楊長桂爲雲南按察使○己丑免四川教匪滋擾之巫山等二十七廳州縣額賦緩徵石砬等十四縣營並南坪巡檢所屬額賦○庚寅以慶成爲藍翎侍衛仍留軍營勦賊○辛卯趙佑卒以汪承霈爲左都御史轉蔣日綸爲工部左侍郎○壬辰諭魁倫奏審擬福甯前在旗鼓寨殺降一案請將福甯發往新疆自備資斧效力贖罪等語福甯在旗鼓寨誘殺已

降之賊致各處賊匪心懷疑懼不肯投出其罪甚重本應照擬發遣姑念福甯恐降賊不可深信辦理錯謬尙屬有因著加恩免其發遣自備資斧前赴額勒登保軍營作爲兵丁效力贖罪○諭魁倫奏蓬溪城外被賊焚燒並見民人被害屍骸此非魁倫疏防縱賊而何魁倫旣見賊眾如此殘害生靈尤當竭力勦殺乃毫無展布轉於獅子山駐紮株守豈魁倫僅於沿途掩埋骸骨卽爲辦賊耶似此遲留不進是誠何心朕看此股賊匪其勢蔓延見據奏附近民人有被裹脅者若遷延時日則日聚日多又安知不成大股賊匪儼魁倫欲俟養成賊勢再行勦殺以顯其功恐彼時貽誤地方罪難寬貸當已早經拏問治罪矣懔之○褫倭什布朗頂留軍營效力○癸巳諭新疆各回城自乾隆二十四年平定後卽鑄造乾隆通寶錢文通行至今敬思新疆二萬餘里俱係 皇考

開拓撫定之區國寶流行所當萬年敬守見在阿克蘇請領祖錢
式樣所有新疆等處地方自應鼓鑄嘉慶錢以資行使至乾隆錢
尤應永遠通行嗣後新疆地方鼓鑄乾隆錢二成嘉慶錢八成一
體行用萬世子孫敬謹遵循勿替○嚴誠督撫譚災○乙未諭軍
機大臣等此次兵勇趕上賊匪追殺三十餘里殲斃三四百人生
擒一百餘人似屬得手詎賊匪數千突出衝截朱射斗落馬被傷
陣亡將弁兵丁俱有損折覽奏實深軫惜此次挫失實由賊多兵
少並非打仗不力官兵一挫之後未免稍阻銳氣自不必復事窮
追魁倫惟當於潼河一帶嚴密堵禦以遏賊匪奔竄成都之路至
七十五旣因足疾不能騎馬而鮮大川一股見在川陝楚交界屯
聚伊所帶兵力亦屬無多卽令仍在原處堵禦不必調赴川西見
在川省督兵止有魁倫一人目前官兵偶有挫失正須持以鎮定

慰問傷亡休息士卒以冀軍威再振魁倫當堅持定見料理軍務
不可心忙意亂轉致有誤事機也○撥部庫銀一百萬兩備陝西
軍需○以陸有仁爲工部右侍郎瑚圖禮爲廣東巡撫調瑚圖靈
阿爲盛京刑部侍郎成書爲盛京戶部侍郎以穆克登額爲盛京
兵部侍郎由通政使遷○戊戌諭朕惟崇儉黜奢治道所尙朕素喜儉
樸乃出於天性一切起居服御不肯稍事紛靡儀親王永璇等素
所深知乾隆四十年以前書房中每遇年節餽歲等事於師傅及
諸昆弟等偶有備物將意之處不過如意荷包食物此往彼來互
相酬答從未有以陳設玩器相持贈者迨近年以來不免踵事增
華沾染習俗閒有陳設之物朕已深爲憎厭總由習尙浮侈外省
官員養廉豐厚又三節兩生日得受屬員規禮惟以華靡相高遂
致吏治難以整頓至在京官員得項本屬有限亦復轉相倣效漸

事奢靡又藉口於俸入較薄日用不敷最爲陋習是以朕於親政之初節經降旨停止貢獻禁絕苞苴以期還淳返樸復我滿洲敦龐風氣使旗民人等咸知節儉庶生計日臻寬裕訓諭再三至爲嚴切乃本日肅親王永錫因三阿哥於本月十八日上學備進玉器陳設等物並不奏明輒令伊本府太監轉交皇后飯房太監遞進實大不是向來皇子上學外廷臣工本不應與聞卽朕兄弟子姪從前入學讀書廷臣亦初不知有此事如儀親王永璘成親王永理慶郡王永璘定親王繇恩等均係近支因曾在上書房讀書備物致送亦止係筆墨等件並無玉器若永錫止係遠派宗藩三阿哥上學與彼何涉若伊先行陳奏朕必不准其呈遞又况所進之物內中並有玉器陳設等件乃並不奏明私遣太監遞送至皇后飯房更屬冒昧永錫自因恭阿拉之女係屬伊媳欲因此牽涉

瓜葛在朕前嘗試伊卽與恭阿拉誼屬姻親互相往來原所不禁與朕同皇后何涉豈得因此而干及內廷皇子乎其心不可問矣前此慶郡王永璘於 穎貴太妃七十壽辰備物申祝因其未經先行奏明輒令護衛太監擅自呈遞是以將永璘退出乾清門並交宗人府議處但永璘本係內廷王子又因幼蒙 穎貴太妃撫養呈遞壽儀理所宜然所欠者未奏耳今永錫迥非永璘可比乃似此妄行呈遞其罪更重於永璘百倍且永錫管理圓明園八旗事務諸事高興擅將宏雅園私行居住見在二十七月內朕尙不詣圓明園而永錫轉將官園私住有是理乎永錫種種不合著將所管鑲藍旗漢軍都統及管理圓明園八旗事務俱行革退仍交宗人府議處伊子敬敏著革去副都統散秩大臣敬敏革去額委散秩大臣俱在閒散王公上當差稍示內外之限制至內外臣工

此後如尙有不知謹飭仍前以陳設玩好私相餽送者一經察出必重治其罪決不姑貸將此通諭王公內外滿漢大臣等一體懍遵並著傳集各親王郡王將永錫所進物件當面擲還○庚子諭據理藩院奏回子郡王銜貝勒哈迪爾之母請旨給予誥封等語從前各城回子及在京回子王公等並未編旗分佐領是以不予誥封惟哈密吐魯番已編定旗分佐領之回子王貝勒與蒙古王公扎薩克等一體給予誥封今哈迪爾已入鑲黃旗蒙古旗分見在御前行走著加恩照旗人例賞給誥封其餘回子王公仍照舊例不必給予○辛丑諭祝雲棟奏請將民間應納錢糧以穀代銀一摺所奏斷不可行國家設立倉庫均關緊要小民輸納正供銀米本有定額若將應完地丁銀兩槩行徵收米石是倉儲蓄積豐盈而庫項竟致短絀成何事體見因各省地方官徵收漕米滋弊

屢降諭旨嚴禁今若令百姓盡輸本色是各州縣例收漕糧外又添無數漕糧浮收之弊更難禁絕苦累閭閻莫此爲甚卽如地方官買補倉穀若非豐收應補之年尙不准各州縣率行採買恐糧價增昂有妨民食祝雲棟卽因調劑倉儲起見自有舊定章程可以遵辦何得率請以穀代銀實屬全不曉事至摺內於禾字缺寫一筆竟不成字乾隆六十年欽奉 皇考諭旨 特賜朕名天下臣民皆所共知禾字本無可避何庸缺筆祝雲棟係科甲出身見任道員豈於中外通行文字尙不諳曉則其辦理地方事務不能留心更可槩見且將斷不可行之事妄行瀆奏錯謬已極著將祝雲棟原摺發交蔣兆奎卽調祝雲棟來至省城當面傳旨嚴行申飭並將原摺擲還○諭軍機大臣等魁倫奏川西竄匪自高院場接仗後一竄鹽亭南部等處一竄太和鎮射洪勢甚猖獗嗣大兵

到彼不及搶渡其分往太和鎮射洪賊匪亦向鹽亭奔竄魁倫束手無策竟不足恃著勒保星赴川西催調貴州兵丁迅速趕到不可片刻遲延以期剿除淨盡至阿迪斯以本省將軍大員於川西竄匪情形從未有一字奏及且帶兵在大甯閒住據稱率同德英額在彼防堵究竟防堵何賊著勒保嚴查具奏○福甯以率裁鄉勇仍發伊犁效力○壬寅諭倭什布前在湖廣總督任內防堵疏懈致川陝竄匪闖入楚境是以將伊革職示懲近日倭什布在楚督率兵勇分投堵剿並將竄匪偪入房縣南山尙有微勞且念其平日官聲尙好於楚省情形亦較熟悉雖前此疏防貽誤咎有難辭但賊匪奔竄無定卽如陝甘督撫亦被川省賊匪闖入境內並未將伊等治罪自難專責倭什布一人倭什布著加恩補授湖北巡撫以觀後效不必給予頂帶仍帶革職留任俟八年無過方准

開復並俟川陝各路軍務全行告竣再行來京陛見高杞著來京
另候簡用○癸卯 額貴太妃薨 上至吉安所奠酒○諭軍機
大臣等尙書劉權之代四川舉人朱倬條奏川省情形如所奏欲
平賊匪必須保全蜀地尤在保川西川南其守禦之道尤以團練
鄉勇嚴防潼江爲重年來川東川北夫米等項皆恃西南協濟今
賊渡嘉陵江順慶所屬已被滋擾若賊再窺潼江則潼江以內素
未被賊之西南各處豈能接濟東北等語所見甚是又稱各省州
縣中爲厭論所與者如劉清尹英圖等朕亦知其素得民心而川
省劣員如戴如煌等平日任意貪虐以致激成事端亦朕所深知
總由該省大吏怠玩廢弛全不以地方爲事於員賢否置之不
問而魁倫接辦軍務後又不能妥爲布置致任賊匪搶渡嘉陵江
擾及川西完善地方其罪甚重見在卽能將竄匪堵住亦僅可略

減其罪斷無仍任川督之理勒保前任經略惟知株守達州聽賊
匪奔竄是以將伊革職治罪而辦理地方事務尙無大過著加恩
賞給三品頂帶辦理四川總督事務仍帶革職留任俟八年無過
方准開復前因魁倫兵力有限會令將賊匪仍逼回川北今據朱
倬稱蓬溪南阻潼江北阻嘉陵江賊匪屯集之處係屬絕地若將
賊誘近合州地界而以重兵扼住蓬溪定遠遂甯之間則三面阻
水可以全股擒獲等語於該處地理險要情形頗爲明切未必非
目前一好機會勒保須察看形勢督兵在兩處江岸之中實力防
堵以期蹙之死地於潼川之東嘉陵江之西將賊一鼓殲除其朱
倬所稱官聲素著之各州縣已用硃筆圈出著勒保酌量奏請調
赴軍營效用其川省貪劣各員亦著據實嚴參治罪○丁未諭教
匪滋事起於湖北沿及河南陝西四川地方往來逃竄迄今四載

有餘尙未蕩平朕心日深焦塵推其蔓延之故總緣領兵大員及各督撫等未發天良既不能卽在本境將賊匪剿滅任其奔逸而鄰省又未能實力堵禦縱賊入境卽有能拏獲一二賊首者輒思藉此邀功仍置餘黨於不問以致展轉滋蔓復行勾結所至之處荼毒生靈勞師糜餉不可勝計伊等貽誤之咎實屬百喙難辭今當列其罪狀再行明白宣諭俾眾知之如湖北教匪在枝江宜都起事時惠齡係湖北巡撫在彼勦辦並未設有總統嗣因永保由烏嚕木齊回京在西安地方具摺請赴湖北軍營而福康安又保奏其人尙可用是以授爲總統專勦湖北賊匪乃永保坐擁多兵毫無調度賊匪在鍾祥屯聚時明亮駐紮鍾祥之正南合之東南西南三路止有兵三千餘名不敷防堵永保在鍾祥之北面帶兵九千餘名多寡懸殊明亮與永保以此遂生嫌隙詎知賊匪不由

明亮一路兵少處竄逸轉向永保北面兵多處奔逃自此由鍾祥北竄焚掠潯河鎮竄至黃龍壩 皇考因明亮與永保彼此齟齬恐誤軍務令明亮前赴湖南專辦苗匪而永保仍前怠玩不將賊匪在湖北境內殄滅縱令偷渡滾河闖入豫境此永保首先縱賊之罪其時景安若能在豫省各要隘督率堵禦則賊匪前有攔截後有追兵亦不至肆行衝突乃景安畏葸怯懦有心避賊僅在南陽株守不發一兵賊匪遂從武關竄往陝西毫無阻擋雖有慶成在河南盧氏一帶打仗稍挫賊鋒而已不能遏其西竄此景安縱賊入豫又復擾及陝境之罪追賊匪已竄至陝秦承恩並未督率文武扼要堵截聽其由商州鎮安逃往石泉紫陽而漢江船隻又未盡泊南岸使賊匪得以搶船徑渡漢江從漢中直竄川境此又秦承恩縱賊入陝又復擾及川省之罪至四川教匪其始不過王

三槐徐添德二人在東鄉達州滋擾爲數無多彼時係英善勒禮
善勦辦若卽能奮力攻擊原不難立時撲滅乃亦因循遲緩致賊
匪四出勾結日聚日多勒禮善旋在東鄉被賊戕害英善雖帶兵
未久尙未縱賊出境辦理遲誤之罪亦無可辭至宜縣以陝甘總
督總統軍務自到川省後惟知在大城寨蓋房居住一年有餘並
未與賊接仗使賊匪得以從容裹掠肆擾頻年至今未能勦盡伊
卽年老多病亦應及早切實奏懇解任乃貪戀因循致滋貽誤其
罪實不可恕至惠齡係接辦永保總統之事帶兵總不出力因其
在湖北時曾將聶傑人張正謨劉啓榮生擒在四川時曾將羅其
清冉文儒等獲尙有微勞可錄且在軍營尙無婪索賂私之據前
已降爲侍郎姑免追問此外貽誤諸人除永保業經定擬應斬監
候外景安見已拏問俟解京時交軍機大臣會同刑部審訊定擬

具奏秦承恩前已革職因伊有母喪加恩令其回籍今已將服闋
豈可任其安居故里著費瀋傳旨將秦承恩發往伊犁效力贖罪
押令卽由籍起程英善著革去吏部侍郎加恩賞四品頂帶隨同
和甯仍在西藏辦事宜縣若仍令以三等侍衛辦理烏里雅蘇台
參贊事務不足示儆著縣佐傳旨將宜縣革職發往伊犁效力贖
罪卽由該處發往以上各員經朕此次分別懲辦罪狀昭著嗣後
各路領兵大員督撫等任勦賊之責者總須在本境將賊匪殲盡
不得縱令他竄任堵禦之責者亦須在本境嚴密防守不得任賊
闖入當以永保景安秦承恩宜縣等爲戒以期共知儆惕奮勉成
功無負諄諄告誡至意將此通諭知之○前軍機大臣等此時陝
甘川楚賊匪分投奔竄來往靡常著責成各路領兵大員自奉到
諭旨之日爲始各將專辦賊匪卽於本境勦盡始甘省賊匪專交

額勒登保那彥成勦辦陝省賊匪專交台布勦辦四川賊匪專交
德楞泰魁倫勒保勦辦湖北賊匪專交松筠明亮倭什布勦辦務
將本境專辦之賊設法兜截殲滅無遺儻因勦捕緊急竄逸出境
遂爲了事不但不能邀功必當重治其縱賊之罪若各該省邊界
堵禦不嚴致令竄入亦必當重治疏防之咎並著經略額勒登保
查明堵勦不力之員卽行據實奏總之堵勦各有專司則賊匪
所到之處卽不能復行竄越而領兵大員責成旣專亦無從推卸
諉咎庶各齊心併力以期剋日竣事儻仍前延玩賊匪遲完一日
不特朕心引咎刻難自寬內而軍機大臣外而領兵大員之罪亦
日重一日諸臣務當懍遵訓諭勉之又勉當以從前貽誤諸人作
前車之鑒也○轉祿康爲吏部左侍郎調書敬爲吏部右侍郎轉
惠齡爲兵部左侍郎以縕布爲兵部右侍郎

由總管內務府大臣遷

○戊申

上以 賴貴太妃啓殯至吉安所臨送○陝西巡撫台布奏連
殲安康一帶賊匪擒獲首逆王金桂得旨嘉獎○庚戌諭原任大
學士蔡新人品端正學問深醇久任翰林兼綜部務俱能恪共奉
職而在上書房行走年分最久朕與諸昆弟俱經授讀懋著慎勤
自予告回籍以後頗養林泉年逾九秩鄉望翕然茲聞溘逝實深
悼惜著加恩晉贈太傅並著巡撫汪志伊前往代朕奠酒所有應
得卹典著該衙門察例具奏其原任內如有降革處分俱准其開
復以示朕眷念舊臣恩施無已至意○諭原任戶部尚書曹文植
原任左都御史胡高望俱於前歲先後溘逝其時正值 皇考聖
體不豫朕心日深焦切未經加恩賜卹今思曹文植在南書房行
走有年胡高望久直上書房又曾在南書房行走均屬勤慎身後
未蒙恩卹殊堪軫念曹文植胡高望俱著加恩補行給予卹典該

部察例具奏其原任內如有降革處分俱著開復以示優卹舊臣
至意○謝原任侍郎謝墉在上書房行走有年勤慎供職朕自幼
誦習經書係原任侍郎加贈太師尙書銜奉寬授讀及長而肄習
詩文蒙 皇考特派謝墉講論頗資其益嗣因謝墉在學政任內
聲名平常是以 皇考將伊降爲編修但念謝墉究係內廷舊臣
學問優長且在書房供職時並無過失著加恩追贈三品卿銜該
部照例給予卹典以示朕眷念施恩至意○諭軍機大臣等王德
等奏總兵李長庚等追捕夷匪駛至南日洋面瞭見蔡牽盜船三
十餘隻在洋游奕等語該鎮瞭見盜船何以知是蔡牽船隻或係
弁兵希圖冒功恐情形尙非確實見有生擒盜匪六名著王德等
向其究詢是否實係蔡牽船隻有何標記再行具奏至道員吳鼎
斐之母年逾八十迎養在署何以忽行呈請終養知府祥慶稱患

怔忡此等病無可查驗或該省道府因近有會匪洋盜難以辦理
思離該省亦未可定王德等嗣後於此等開缺人員仍須留心查
察毋任藉詞規避再原任大學士蔡新病故已降旨令汪志伊前
往代朕奠酒漳泉一帶向有會匪械鬪等事實爲地方之害該撫
正可順道查勘有無匪徒私行糾聚之事量加懲辦以儆刁風○
諭吉慶等奏洋盜接踵投首一摺洋盜接踵投首固出於一時改
悔但此等人多係積年爲盜頑梗難馴近日自行投首者過多難
保其永遠安靜守法該督等務宜留心防範該匪旣准其自新自
應於通省州縣分別安置但人數眾多又安能人人隔別若附近
海洋地面令多人聚處又致故智復萌殊有關繫該督等所奏見
在查明入官沙田酌量分給尙屬可行若令地方官派充民壯則
斷不可此等洋匪儻令充當民壯旣與該管地方官過於親近並

恐其桀驁成性或倚恃在官人役欺虐民人尤爲地方之害著旨
慶等將投出各犯分散布置於相距海洋較遠之州縣量爲分插
酌籌安頓之法令其各自謀生日久化爲良善所有呈出器械礮
位俱應點驗收貯其交出艚船即可充公駕駛以資捕盜之用至
安南夷匪若有自行投到者斷不准收納應隨時遣回原處以免
滋生事端○以馮光熊爲兵部左侍郎琅玕爲貴州巡撫高杞爲
刑部右侍郎原任湖南巡撫○辛亥以扎郎阿爲內閣學士由副都統選○以
清安泰爲廣西布政使百齡爲湖南按察使由奉天府府丞選
三月甲寅諭刑部呈進情實官犯及服制人犯黃冊與常犯招冊
同進毋先期請句以示哀矜○丙辰諭據鐵保奏檢查歷年飭發
各省糧道及軍衛審訊詞訟未結者共有六百六十餘案請分別
註銷起限以清積案等語已另降諭旨令鐵保查辦矣潛督衙門

發審各件積壓年久皆由管幹員富綱梁肯堂等廢弛所致因思
總漕專司漕務發審未結事件卽有六百六十餘案之多地方有
司詞訟紛繁其歷年積壓者更不知凡幾州縣惟知以逢迎交結
上司爲急務遂置公事於不問視陋規爲常例以缺分美惡爲得
項多寡總思滿載而歸視民生如膜外而督撫司道等亦止知收
受屬員規禮並不隨時督察上緊嚴催而胥吏等又利於案懸不
結可以兩造恣其需索以致拖累多人日久塵積上下相蒙其弊
已非一日此朕所深悉者屢經降旨嚴飭見在綱紀肅清地方官
吏諒不敢仍蹈故轍顯事苟直但於歷年積壓之案尙不能勒限
清釐卽如湖北呈控各案上年發交高杞審辦者至今未盡奏結
至直隸長新店盜案經朕指出盜首張標節次嚴飭胡季望訪拏
始能破案其餘案件積壓者尙多復經降旨飭催該督撫於朕特

交之事尙爾耽延况問刑衙門自理詞訟本無一定例限有不日
積日多竟至延閣不辦者乎京中部院辦事皆有例限從不許積
壓多案外省地方官事同一例豈得任意稽延嗣後各直省凡遇
地方案件除審辦命盜本有定限外其餘自理詞訟著各督撫分
別立限飭令有司按期完結逐件註銷若有任意遲延逾限不結
者立即參奏儻意存徇庇經朕訪聞或被他人糾劾必將該督撫
一併嚴處決不寬貸○諭軍機大臣等本日午刻有魁倫六百里
加緊報至朕以爲必係將奔竄川西賊匪痛加殲戮及披閱所奏
情形仍屬派撥兵勇分守沿河一帶與半月前所奏無異伊前此
具奏防堵竄匪情形擅用六百里加緊馳遞經朕降旨嚴飭若非
擒獲首逆及大得勝仗豈得仍發六百里加緊之報駭人聽聞致
勞驛站何不曉事一至於此至該處鄉勇業經劉清募足分投防

守其前派防河官兵俱已撤回魁倫自當親率官兵上緊勦辦乃
僅派令阿哈保張超等帶兵前赴彰明江油通中之地駐守魁倫
於拜摺後始行拔營前進欲在魏城梓潼地方駐紮相機調度豈
竟任賊屯聚待其自斃乎畏葸情形實如繪出至摺內既稱德楞
泰由廣元昭化一路而來何以魁倫並不催令速至川西卽勒保
此時諒早入川亦未見魁倫咨催趙程行走且黔兵三千據奏約
三月初旬卽可全數到齊所謂松岡等處土兵尙未據稟報起程
日期魁倫與其用六百里加緊奏此無關緊要之摺何不用以飛
催德楞泰勒保及黔土各兵乎伊向來自稱勇往乃竟延玩怯懦
至此實屬大負委任魁倫著傳旨嚴行申飭○緩徵陝西教匪滋
擾之咸甯等六十四廳州縣新舊賦課○以平恕爲內閣學士由
詹事
遷○戊午諭戶部議覆長蘆鹽政觀豫奏請蘆東鹽斤加價一

摺所駁甚是已依議行矣見在軍務尙未戡事一切兵餉供支皆須發帑接濟固應寬爲籌備但朕斷不肯因此有累及閭閻之事教匪何民也原因不肖官吏勒索苛刻激成此事至今未能復業自滋事以來到處焚掠裹脅百姓偏於饑困不得已而從賊是欲剗平賊匪必先使吾民各安生業民安而賊自可平多安一民卽少一賊此事理之必然者若因軍興需費浩繁遂思脔削百姓之脂膏冀補國家之帑項或致生計不足別滋事端卽言利則所費豈不更多爲害更大朕躬行節儉永杜貢獻言利之徒無所施其伎倆惟近日臣工往往藉軍需爲名在朕前嘗試巧言利國實皆利己此等假公濟私之人本應加之譴責但人材不易豈遂以一眚遽斥此時亦第存之於心不肯宣露早已薄其爲人矣卽如長蘆加增鹽價一事雖計算食鹽之人每日所費不過一二文似屬

有限而不知鹽斤爲食用所必需一經議增則人人均受其累且私販本因官鹽價昂而起今再議增加則私鹽自必更爲充斥官引墮銷愈多長蘆鹽價加增已非一次卽該商積欠各款節經寬免展限者亦非一次恩施不爲不厚豈得復行干瀆爲此無厭之求况鹽價旣增之後卽不能復減累民甯有已時雖據觀豫奏稱此次加價爲清完積欠而設但加價之後該商等亦未必能清完國課徒然病民以裕商更屬不值朕甯可使帑項有稽而斷不肯朘民以益帑况天下山陬海澨所有財貨皆朕之財貨豈必聚於官府踵瓊林大盛之鄙識哉爲天子者富有四海不問有無藏富於民周流泉幣斯得九五福二曰富之大旨矣昨兩淮浙江廣東各商俱籲懇報效而長蘆商人並未呈請出貲助餉更無可藉口今若允該商等所求致兩淮等處亦復效尤紛紛懇請加價更無

所底止矣朕勤求上理惟思克己利民以符損上益下之義將來
軍務完竣卽見開捐例亦當停止豈有無故將鹽價加增之理乎
觀豫此摺雖未必爲牟利私己起見但率聽商人從愾遽行瀆請
實屬不合觀豫著飭行將朕此旨與諸王及大學士九卿同看卽
行覆奏○庚申 上啓鑾謁 東陵 西陵○免經過地方額賦
十分之三○壬戌諭本日由四川軍營奏報參贊德楞泰連得勝
仗生擒首逆川西將次肅清又據甘省軍營奏報經略額勒登保
參贊那彥成截剿邪匪不令入川擒獲偽元帥殲戮千餘名正值
朕駐蹕隆福寺此皆 上天 祖 考垂佑欣感不盡明晨敬詣
諸陵虔申叩謝軍機大臣每日自寅至酉實力贊襄助朕籌畫
實屬辛勤俟大功告成自當予以世職先著各加一級軍機章京
及兵部聽報章京均著賞給紀錄二次沿途驛站咨行各督撫俱

加賞賚○以勦殺川西賊匪擒首逆陳得倖等功授德榜泰內大臣○以截勦甘肅教匪功予慶成三等侍衛○癸亥 上謁 昭西陵 孝陵 孝東陵 景陵 裕陵○諭阮元拏獲杭紹地方窩盜陳阿三等審明定擬一摺阮元到浙未久甫經實授巡撫於積年窩盜要犯卽能留心查察飭屬嚴拏到案具見緝捕認真各省地方官吏遇有多年盤踞盜匪往往畏難苟安不肯卽時督拏任其擾累閭閻最爲惡習卽如直隸省張標一案經朕訪聞密諭直隸督撫迅速查拏而伊等總心存畏事遲遲不辦以致釀成長新店肆劫之案今浙省疊次窩劫盜犯若阮元亦復遷延遲緩並不及早查拏亦必致容奸遺患阮元辦理此案任事實心克副委任又提督蒼保黃巖鎮總兵岳璽在洋接捕土盜擒獲一百七十餘名見俱解省審辦看來浙省吏治大有起色均堪嘉獎阮元蒼

保岳璽俱著交部議敘○甲子清明節 上謁 裕陵躬行敷土
禮詣 隆恩殿行大饗禮○乙丑以阿迪斯擁兵玩誤奪職逮問
以勒保護理成都將軍○丁卯 上幸南苑○諭據德楊泰奏連
日截剿渡江各股賊匪大獲全勝生擒著名首逆冉添元等一摺
覽奏深爲欣慰冉添元等各股賊匪在江油之重華堰屯紮占據
關耳梁一帶山包又於樹林房屋內潛行設伏經德楊泰派兵進
擊賊匪敗退佛耳巖火堽口等處潛匿箐林口令其夥黨假充難
民詭稱賊眾已遁入雁門壩欲誘我兵墮其計中德楊泰窺破豫
令兵丁準備而進行抵箐林口突有馬步賊匪數千衝出官兵奮
勇迎剿將賊匪痛加殲戮賊匪復竄回重華堰德楊泰督兵追剿
又在馬蹏岡火石堽一帶鼓勇奮擊槍箭並發先後殲擒賊匪二
千餘名生擒首逆冉添元並各股賊目偽總兵鮮其順等實爲將

士同心奮力所辦可嘉之至此皆 上天 祖 考垂佑兵勇效力擒此巨惡川西民生得安曷勝感慰德楞泰此次帶兵入川連獲勝仗今又五日四戰破賊奸計殲厥渠魁深堪嘉獎德楞泰本係二等男爵著再加恩晉封三等子以示優眷其隨同帶兵之阿哈保賽沖阿溫春阿穆勒塔李紹祖色爾衣馬瑜等奮勇爭先衝鋒力戰俱著交部議敘又射倒騎馬賊首再添元之委防禦蘇爾慎如見係六七品官職卽著授爲三等侍衛如見係五品官職卽著授爲二等侍衛將來凱旋後卽令留京當差所有此次德楞泰帶領打仗殺賊兵丁俱著賞給一月錢糧以示鼓勵如尙有奮勇出力之員弁等並著德楞泰查明續行具奏候朕加恩○諭陝西五郎地方層巒複嶂道路分歧奸民易於藏匿自當專設總兵大員永資鎮守以爲西安省城屏障著照長麟所請設立總兵一員

賜名甯陝鎮在五郎廳駐紮其應設將備及安置墩汛各事宜該督撫酌議具奏所有陝西甯陝鎮總兵員缺著劉之仁調補其興漢鎮著改名陝安鎮漢興道著改名陝安道○前軍機大臣等朕思各股賊匪屢被殲擒勢極窮蹙近據各路奏報賊夥自行投誠及難民由賊營逃出者絡繹不絕正在勦撫兼施喫緊之際此次勦辦教匪非若邊徼外域必須候全數蕩平受降奏凱後方籌辦善後者可比自應一面按捕餘孽一面妥爲安撫況此等從賊匪徒實皆赤子既經悔罪投出貸以不死卽當愛之如子各遂其生其撫輯之方不可不及時籌畫見據長麟奏稱甘省自賊營逃回之川楚難民甚多俱經給予路票釋放回籍但所給路票止係免死憑據仍無謀生實濟因思見在急須安撫之人約有三等一係降賊一係難民一係鄉勇此三項若俱籍爲兵丁則人數衆多又

安得有如許營分廣爲分隸若於投出後聽其各自謀生其有業者尙可自爲餬口之計而無業之人非官爲經理安置得所則伊等雖去逆投順而無衣無食何以自存饑寒日久必致故態復萌又思搶掠一經繩以官法又恐激成事端彼時業已撤兵又將如何辦理至鄉勇一項其團練者多係本省有身家之人惟召募一項良莠不齊一旦散歸鄉里未必皆有生路是安撫之方目前切宜早籌妥辦總之有恒產者方有恒心或將查出叛產及被賊難民絕產量爲分給或於曠閒地方如南山老林等處可以耕種之區撥給開墾數年之內免其納糧俟墾有成效再行酌量升科庶各安本業不至復懷反側此三項中如絕產一項有目前查係絕產而流民逃戶日久或又歸其本土勢又難將業主地畝奪與失業之人轉使本人無所依藉至清查叛產開墾荒地頭緒紛繁均

賴良有司宣力妥辦方能經理協宜將此傳諭陝甘四川湖北各督撫於所屬道府州縣中遴選平日居官嚴明公正實心愛民者使之專董其事不妨將其本缺開除畧倣從前觀風整俗宣諭化導等使之意不必另設官名各依本銜給予廉俸俾其專心撫輯如果能盡心籌辦著有實效該督等卽據實奏明朕必逾格施恩加以獎擢儻辦理不善或有懈弛玩誤者亦卽嚴參治以應得之罪仍將此旨謄黃曉諭俾眾共知各遂其安恬樂業之願○戊辰免經過地方會辦兵差之宛平等三州縣額賦十分之五房山等三州縣十分之三○壬申 上謁 泰陵 泰東陵回鑾○癸酉諭魁倫於經畧額勒登保赴甘截勦竄匪時奏明將軍移交伊接辦當經降旨將川北賊匪責成魁倫勦捕乃魁倫接辦以後於防堵事宜漫無覺察不能妥爲布置致任賊匪擾及川西之完善地

方彼時卽應將魁倫革職拿問治罪特因一時乏人接辦從寬僅將魁倫拔去花翎革職留任仍留頂帶以觀後效魁倫自賊匪竄入川西以後知潼川地方最關緊要督率兵勇嚴密堵禦賊匪不能展轉奔竄俾德楞泰到彼得以相機進擊屢次克捷殲擒著名首逆多人伊雖疏縱於前而防守潼川尙能持以鎮靜稍有微勞是以曲加寬貸魁倫仍著加恩署理四川總督但伊獲咎甚重此時若仍用一品頂帶伊亦自覺無顏著以三品頂帶辦理總督事務仍帶革職留任八年無過方准開復其不能防守之罪卽以此示薄懲不必交部嚴議矣至勒保前在貴州本有勦去年任經略時惟知株守達州任聽賊匪竄擾是以將伊革職治罪而辦理地方事務尙無大過前已降旨授爲藍翎侍衛暫護成都將軍印務此時川北一帶尙有賊匪竄入亟須大員帶兵進剿勒保著格

外加恩以四品翎頂補授四川提督仍帶革職留任八年無過方准開復勒保卽當徑赴川北將各股賊匪以次殲除用副棄瑕錄用至意○諭滿洲風俗瀟樸向俱嫻習騎射及馬上技藝感激君恩爲國效力是以每遇出征皆歡欣嚮往所至立覲大功卽派出隨圍亦皆奮勉爭先其中不得派往者卽自覺愧赧並無過差退縮藉端規避之人近來習俗日下年少者惟圖安逸差使怠惰技藝廢弛竟有不能騎馬者卽如治儀正承員平日差使旣屬懶惰而此次該衙門派出隨扈恭謁陵寢膽敢捏稱葬妻藉詞告假並不隨往卽實有此事亦非伊父母之事可比况此語尙屬虛捏實爲膽大不法若不嚴加懲治將來滿洲世僕不知儆戒互相效尤所關甚重承昌著革職交總理行營王大臣傳集乾清門侍衛大門侍衛粘竿處侍衛拜唐阿鑾儀衛章京及各處章京拜唐阿

等眼同將承昌重責四十鞭以示儆戒仍著胡季堂立即派員押解發往熱河交德勒克扎布令在該處披甲嚴加管束儻有逃走等情鞫獲時卽照例具奏正法此旨著通行曉諭嗣後滿洲世僕各勤厥職以復淳樸舊風毋得任意偷安儻不知畏懼仍復懶惰從事則承昌卽前車之鑒也○甲戌德楞泰奏痛剿川西竄匪生擒賊目多人得自獎資投御前侍衛○乙亥 上還京師○己卯諭朕恭閱 皇考高宗純皇帝實錄參領金珩奏請將各省駐防滿洲蒙古漢軍官弁子弟於禮科兩試令該將軍考試馬步箭卽送附近府院考取一事 皇考欽遵 皇祖諭旨以駐防弁兵子弟有能讀書向學者聽其來京應試若悉准其在外應考則伊等競尙虛名必致騎射生疏操演怠忽將來更有何人充駐防之用將該參領申飭事未准行仰見我 皇祖 皇考審慮周詳誠恐

駐防弁兵專習文藝致弛武備再三 申諭意至深遠因思上年
通恩條奏駐防事宜一摺內稱請令各處駐防旗人另設學額就
近考試入學再聽赴京鄉試等語彼時朕尙未恭閱 實錄所載
此條卽交軍機大臣議奏准行蓋因各處駐防兵丁較之雍正乾
隆年間生齒增倍而披甲名糧例有定額槩令食糧當差則人浮
於缺勢有所難若徒手嬉遊毫無所事必致習於非義其有能讀
書向上通曉文義者如必令遠赴京師應試資斧又恐不給是以
准就近應歲科試以廣進取之階我滿洲根本以騎射爲先若八
旗子弟專以讀書應試爲能必將輕視弓馬怠荒武備殊失國家
設立駐防之意嗣後各省駐防官弁子弟不得因有就近考試之
例遂荒騎射本業著該將軍都統等通行飭諭各官弁等訓練子
弟以騎射爲首務其攻肄舉業者仍當嫻習騎射務臻純熟以仰

副 皇祖 皇考教育八旗諄諄垂訓及朕多方造就之至意將此通諭知之○辛巳諭朕恭閱 皇考高宗純皇帝實錄乾隆三年八月欽奉 諭旨賢良大臣之子孫已登仕籍者固多其中或有不能自振漸就零落之人亦屬可憫除見在入祠大臣之子孫有文官七品以上武官五品以上已經錄用無庸查奏外如子孫並無仕宦或有品級而甚屬卑微者著該部行文各旗都統及直省督撫查係嫡裔擇其品行才質可以造就者給咨送部帶領引見酌量加恩仰見 皇考獎勵前勞有加無已欽惟 皇祖建立賢良祠實爲千古曠典 皇考復念其後裔恩意有加迄今已閱六十餘年朕欽誦 聖謨緬懷篤棗凡宣勞佐治之大臣曾入賢良祠者其子孫或未登仕籍或品級卑微著該部行查八旗都統及各該督撫等遵照舊制詳悉查明送部引見以示朕念舊加恩

至意○諭前據胡季堂奏請將河南省之內黃縣改歸直隸管轄
所有該縣地丁錢糧歸於直省其漕運事宜仍交河南糧道辦理
一摺已交部臣覈議施行矣茲據吳熊光奏稱河南全漕皆在內
黃楚旺地方受兌若改歸直隸不特恐誤兌運並慮稽察難周等
語胡季堂請將內黃改歸直隸之意原爲便於緝捕起見但前此
巨盜張標在內黃窩藏本係豫省地方官失於查察該犯於豫省
本境內並未聞有劫盜之案其屢次糾夥行劫乃多在直隸地界
上年經朕訪聞密諭胡季堂上緊查拏該督因係河南直隸交界
地方卽不免存推諉畏難之見因循不辦以致釀成長新店肆劫
鉅案雖經胡季堂派員往拏究係河南官役在被幫同始將積年
巨盜張標擒獲殲斃是查察奸宄惟在地方官認真緝捕不在粉
更定制儻仍前玩忽卽改歸直隸亦復何益且錢糧漕務分爲兩

省辦理既多牽掣於體制亦有不合恭查雍正三年 皇祖曾以直隸內黃等縣爲河南漕糧運道所經隔省呼應不靈令將內黃三縣分隸彰德衛輝迄今內黃楚旺水次進行已久受兌輓運均無貽誤俱各相安吳熊光所奏皆係實在情形又與 前旨相符著照所請將內黃一縣照舊歸於河南管轄不必再議更張其俗名三不管地方亦仍交內黃管理以專責成至該處爲三省交界吳熊光務當飭令該縣實力查察勿令奸宄潛滋其交界之直隸山東等處著胡季堂蔣兆奎各飭所屬嚴密巡緝毋得稍存畛域之見其漕運一切事宜仍照舊例行○肅軍機大臣等前此賊匪偷渡嘉陵江西岸後賴有潼河爲之攔阻賊匪不能肆竄節次降旨令魁倫嚴密防堵使賊匪東扼嘉陵江西阻潼河自投絕地可期一鼓撲滅並以此係魁倫生死關頭諄諄訓諭至再至三昨因

德楞泰連獲勝仗擒獲首逆而魁倫防守潼河尙能持以鎮靜稍有微勞加恩將魁倫以三品頂帶仍留總督本任其不能防守嘉陵江之罪卽以此示懲不必交部嚴議詎料魁倫竟無造化不能承恩又任賊匪竄過潼河其罪甚重朕不能曲加寬宥上年額勒登保因川賊竄至甘境帶兵赴剿將川北剿賊之事交與魁倫交代時如自揣不能勝任卽應留額勒登保在彼或奏明另派他人接手乃竟欣然樂從直任不辭而接辦以後復在達州逗留八日致賊匪從容徑渡雖防守嘉陵江鄉勇查係福甯所撤但魁倫係本省總督於防堵事宜漫無覺察不能妥爲布置致川西完善地方遭賊蹂躪已屬罪無可追今又任聽賊匪竄過潼河情罪重大魁倫卽著革職拏問前因川西賊匪已被德楞泰節次痛剿首逆已擒卽可辦竣是以令勒保帶兵前赴川北今賊匪又竄過潼河

甚關緊要魁倫業已罷斥治罪四川總督一時簡放乏人德楞泰雖打仗奮勇但辦理地方事務非其所能勒保已加恩授爲提督著仍以四品頂帶實授提督暫署四川總督事務並將魁倫交與勒保嚴加審訊按律定擬具奏後不必解京著卽派委妥員解赴成都省城交與先福董教增監禁候旨至賊匪在太和鎮上游八里之王家背踰灘渡河該處防守文武係屬何員不可不查明嚴加懲辦查出後卽將該員弁一面據實參奏一面革職鎖拏嚴行定罪亦解往成都監禁候旨所有嘉陵江以西之賊責成德楞泰剿辦潼河以西之賊責成勒保剿辦其川北地方零星賊匪著勒保與德楞泰會商派令鎮將酌帶兵力前往剿除○諭楚省竄匪尙多倭什布節次所奏未爲確實松筠見因患病不能帶兵截剿奏請來京業已准行所有湖北剿賊之事專交明亮督辦其防堵

卡隘並攔截賊匪等事交倭什布辦理明亮著加恩授爲藍翎侍衛領隊大臣楚省軍務一切情形俱著隨時奏報列銜在倭什布之前○壬午撥部庫銀五十萬兩備陝西軍需○以廣音布爲盛

京禮部侍郎

由左副都御史遷

夏四月癸未朔日有食之○乙酉諭上年魁倫在京時屢次在朕前懇求前往四川剿賊並言伊前任四川營官熟悉地方情形於辦理咽喉時晝夜乘馬按捕不予以暇咽喉匪奔逃疲困用能剋期竣事彼時朕已覺其言大而夸因川省帶兵大員辦賊遲緩用額勒登保爲經略令魁倫暫署總督原不任以剿賊之事魁倫自到川後於辦理團聚堡寨事務尙爲妥協嗣因大股賊匪竄往甘省經略額勒登保帶兵赴甘遂將川省剿賊事宜交與魁倫接辦魁倫若自揣不能勝任或留額勒登保在彼或奏明另派他人接手

乃竟欣然樂從直任不辭而接辦以後復藉等候調兵料理軍裝
爲詞在達州逗留八日致賊匪得以搶渡嘉陵江肆行焚掠魁倫
於賊匪渡江後始帶兵前往仍未親身督戰僅令阿哈保朱射斗
分兵追趕後無接應以致朱射斗被賊鈔截力戰陣亡魁倫因此
更形恇怯不復帶兵剿賊專在潼河一帶督率防守當賊匪搶渡
嘉陵江時勢頗熾張若逞其奔突竟可直犯成都幸而賊匪專以
擄掠爲事在西充地方因徐添德生日演劇酣飲無暇往撲魁倫
營盤而魁倫因賊匪休息之暇得以分布兵勇防守潼河又幸朕
早降諭旨令德楊泰帶兵由陝赴川協剿德楊泰星夜帶兵從廣
元昭化直赴川西連次克捷將首逆陳得倖冉添元李斌等先後
殲擒因念魁倫不能防守嘉陵江之罪雖重而防守潼河尙爲嚴
密俾德楊泰得以緊追賊匪痛加殲戮魁倫亦尙有微勞是以加

恩不卽斥革降爲三品頂帶仍留總督本任其疏於防江之罪卽以此示懲不更交部嚴議並節次降旨以防守潼河係魁倫生死關鍵不可再有疏忽諄諄飭諭至再至三乃昨據魁倫奏賊匪在太和鎮上游之王家嘴地方搶渡潼河朕因此刻深焦廬幸德楞泰帶兵踵至無分晝夜盡力追擊擒殄首逆要犯及大小頭目共殲賊匪一千四百名生擒匪犯一千三百餘名並救出被圍四寨難民萬數千人川西竄匪指日卽可肅清而魁倫前此旣縱賊渡過嘉陵江今又縱賊竄渡潼河不特川西繁庶之區遭賊蹂躪而荼毒生靈又不知凡幾若不將魁倫治罪則貽誤封疆者何以示儆魁倫前已有旨革職拏問其四川總督已令勒保暫行署理魁倫卽著交勒保審明按律定擬具奏在成都監禁候旨至魁倫之子三等侍衛完顏扎拉芬昨已退出乾清門今魁倫旣獲重罪且

完顏扎拉芬人亦平常不勝侍衛之任著革職閒住伊家原有之輕車都尉世職著該旗於年終照例辦理至阿迪斯係大學士公阿桂之子上年經朕加恩補授成都將軍自應倍加威奮力圖報效伊素有足疾如果自揣不能稱職卽當面奏更換乃彼時並無一言懇辭到川以後額勒登保等令其駐紮大甯防堵自係知其帶兵勦賊不能得力從此阿迪斯在大甯株守迄今半載有餘並未移動前此川北賊匪搶渡嘉陵江擾及川西完善地方阿迪斯係本省將軍竟視同膜外既不帶兵速往又不據實奏聞經朕節次嚴飭自知獲罪已重並接到魁倫令伊勦辦川北賊匪知會心懷懼怯始行具摺以冬閒暇疾復發爲詞懇請斥革以遂其避賊之計試思阿迪斯若非心存戀棧何不於上年冬閒卽將暇疾奏出而必遲至今日乎顯係有意諉卸喪良昧心本日復據奏稱伊

駐紮大甯並無專防賊匪因患足疾不能帶兵剿賊在重慶候旨更不成話阿迪斯既玩誤於前又復捏病避賊不料阿桂竟有此不肖之子大傷伊顏面此而不加嚴辦則滿洲勳舊後裔豈不相率效尤阿迪斯著革職拏問交與勒保按律嚴審定擬具奏候朕再降諭旨其成都將軍員缺已著德楞泰補授所有阿迪斯長子三等侍衛兼頭等輕車都尉那彥瞻次子候補中書那彥柱三子那彥福四子六品廕生那彥堪本應革職發往伊犁從前阿桂在雲南軍營獲罪阿迪斯兄弟卽曾發遣伊甯不記憶但念阿桂屢著功勳久任綸扉恪勤供職不忍將伊孫多人均令遣戍且那彥成見在軍營出力今那彥瞻等卽係那彥成嫡堂兄弟因此格外加恩免其發遣俱著革職在家閒住其阿迪斯承襲公爵及那彥瞻所襲輕車都尉世職俱係阿桂所得並著該旗於年終照例辦

理將此通諭知之○德楞泰奏剿擒潼河竄渡賊首雷世旺等得旨嘉獎晉封子爵實授成都將軍○丁亥撥廣儲司庫及熱河廣東銀五十萬兩分備陝西湖北軍需○以文需爲山西按察使由陝西陝安道遷○以貽誤軍務革山西按察使瑞亨職遣戍伊犁○乙未改五郎撫民通判爲甯陝撫民同知○援徵甘肅近賊之皋蘭等二十一廳州縣並沙泥州判紅水莊浪二縣丞所屬新舊額賦○丙申以京師缺雨命刑部清釐庶獄○丁酉濬直隸牝牛河黃家河北村河及新安等八州縣河道○己亥諭嗣後初次三壇祈雨仍奏請遣官至恭祭社稷壇親詣行禮照大祀例齋戒三日著爲令○庚子諭教匪滋事起於湖北彼時係永保總統此一路軍務督兵剿辦當賊匪在鍾祥屯聚之時明亮駐紮鍾祥之正南東南西南三路防堵止有兵三千餘名而永保帶兵九千餘名

在鍾祥北面防堵詎知賊匪不由明亮兵少處竄逸轉向永保北面兵多處奔逃可見彼時明亮一路防堵尙嚴永保一路擁有多兵不能攔截仍任賊匪向北奔竄焚掠潯河鎮繞至黃龍塢偷渡滾河雖卽攔回然從此賊勢鴟張至二年竄入豫境疏縱於前之罪永保難免其時景安係河南巡撫帶領兵勇甚多若能在豫省各要隘督率防禦則賊匪前有攔截亦不至肆行衝突乃豫省惟廣成王文雄張文奇曾與賊接仗亦未能將賊截回而景安一味畏葸懦怯僅在南陽無賊地方駐守該處居民裹攜糧食迎犒官兵景安拒而不納因此大失人心甚至該省文員將糧餉軍火豫備齊全聽候景安調遣而景安不發一兵武員伏地跪求打仗景安亦安坐不顧通省文武員弁俱各心懷不平是以有參將廣福向其譏誚爭執轉被景安參以咆哮治罪民間遂稱景安爲迎送

伯無不人人痛恨而賊匪轉利其在彼得以肆行奔竄賊至之處豫省並無官兵阻撿遂由羅山南召等處竄至盧氏從武關闌入陝境而秦承恩又失於防堵任賊竄往興安越過漢江擾及川境適川匪王三槐徐添德等亦從此勾結蔓延迄今四載有餘未能戡事勞師糜餉荼毒生靈實景安首先縱賊所致前經降旨將景安拏交刑部治罪茲景安業經解到先令軍機大臣會同刑部審訊景安亦自知罪狀昭著無可置辯其所供從前教匪接連北竄時同王文雄帶兵迎剿一節彼時景安並未能趕上賊匪及賊已入陝王文雄帶兵追剿而盧氏境內尙有餘匪屯聚景安何不前往會同慶成等剿辦乃轉向內鄉躲避迫賊匪全出豫境二十日後方到盧氏總在賊後逗留從未與賊接仗一次其懼怯避賊實百喙難辭至所供辦理浙川教匪係據完顏岱面稟該處有教匪

潛匿委員查辦屬實伊親自帶兵前往查拏辦理一節浙川教匪本係伏而未動自應密加防備約束斷無任意妄拏激之生變之理見今賊隊中裹脅之人方節次降旨令各軍營設法招撫豈得將止係習教未經滋事者槩行殺戮乎況此案人犯已經完顏岱審明辦理完結景安始行到彼輒敢張大其事誑稱帶兵斃賊一千餘名生擒首逆飾辭入奏致濫膺伯爵崇封其欺罔冒功之罪景安亦已自認不諱以上種種款蹟若不公同鞠訊明正其罪何以爲封疆大臣貽誤國事者戒景安著交大學士等會同嚴審定擬具奏至永保前在鍾祥擁兵九千餘名不爲不多又專司一面防堵當賊匪向北奔竄時何以不能攔截致令偷渡滾河各情節並著監提永保嚴訊再賊匪向豫奔竄時永保曾否飛咨景安屬令上緊截堵之處並著將永保景安二人一同當面質訊毋任諉

卸○德榜奏剿殲川西竄匪於盤龍驛等處得旨嘉獎擢德榜
泰子三等侍衛蘇冲阿爲二等侍衛賞兵丁一月錢糧○書麟奏
猓黑投順夷境廓清得旨嘉獎晉太子太保○免雲南經過兵差
之威遠等二廳額賦思茅等廳五屬額賦銀十分之五官莊學租
十分之三緩徵景東廳等四屬通賦○辛丑諭大學士九卿等會
審景安永保將景安問擬斬立決永保仍擬以斬監候一摺係屬
按律定擬並非周內亦非寬縱但立決之案係決不待時用之軍
前惟當於失機之際立時辦理以儆戎行景安永保二人一則惟
怯避賊一則縱賊奔竄若律以軍法自當立正典刑今事閱二年
覈其罪狀與當時貽誤卽行治罪者稍有不同景安著改爲應斬
監候秋後處決永保仍照原擬牢固監候○癸卯釋永遠監禁枷
號情輕人犯○丙午 上自午門步詣 社稷壇祈雨○以陝西

教匪竄徧河南革額勒登保那彥成長麟台布花翎○己酉諭王大臣等請將魁倫照例擬斬立決卽於川省正法所擬甚爲允當魁倫係朕特命署理四川總督承辦軍務種種債事較之景安永保貽誤於前者其罪更重難以寬貸卽如和珅爲 皇考任用之人朕因其擅權亂法卽於親政數日內將伊拏問治罪賜令自盡况魁倫係朕特用之人豈肯稍存迴護伊又罪狀昭著有何足惜卽照王大臣等所議將魁倫在成都正法實屬罪所應得但思前此拏獲教匪賊首冉添元陳得俸俱在成都凌遲示眾魁倫曾任本省總督大員若在該處辦理易長刁風非於魁倫尙有姑息也魁倫見在成都省城監禁著楊揆先福派文武妥員將魁倫解京沿途務當小心管押若稍有疏虞致魁倫畏罪自盡必將該解員從重治罪俟解到時仍交此次派出會議之王大臣等同赴刑部

復加審訊照原擬罪名具奏候朕再降諭旨○庚戌以劉鑑之爲

內閣學士

由詹事遷

繼善爲左副都御史

由大理寺卿遷

閏四月癸丑朔撥部庫銀一百萬兩分備河南陝西軍需○甲寅

復命刑部查久禁官犯並官犯子孫不准當差應試及遣戍新疆

永遠不准釋回者寬減之○命五城設廠平糶○乙卯諭聽言爲

致治之本拒諫實失德之大朕從不敢自作聰明飾非文過兼聽

並觀惟求一是而已去年編修洪亮吉既有欲言之事不自陳奏

轉向成親王尙書朱珪劉權之私宅呈進經成親王等先後呈進

原書朕詳加披閱實無違礙之句仍有愛君之誠惟言視朝稍晏

及小人熒惑未免過激令王大臣訊問定以重辟施恩改發伊犁

然自此以後言事者日少卽有言皆官吏之常事而於君德民隱

休戚相關之實絕無言者豈非因洪亮吉獲咎鉗口結舌以致朕

不聞過下情仍壅爲害甚鉅洪亮吉所論實足啓沃朕心故置諸座右時常觀覽若實有悖逆亦不能壞法沾名况皆屬子虛何須置辨而勤政遠佞更足儆省朕衷今特宣諭王大臣並洪亮吉原書使內外諸臣知朕非拒諫飾非之主爲可與言之君諸臣幸遇可與言之君而不與之言大失致君之道負朕求治之苦心矣仍各殫心竭思隨時密奏○釋洪亮吉回籍

上二條恭查本紀輯錄

○命宗人

府查永遠圈禁及發軍臺年久者寬減之○丙辰釋刑部監禁安南人黎侗鄭憲黎值李秉道安置火器營賞馬甲錢糧○是日雨○丁巳諭向來恭遇祭祀齋戒日期各部院衙門例不進本但思大祀如 圓丘 祈穀 常雩朕精誠專壹祇宿齋宮自應循例不進本章以昭虔敬其 方澤 太廟 社稷均係大祀雖照常齋戒而不親宿齋宮若各衙門本章槩不呈進恐致事多積壓嗣

後凡遇齋戒日期 圓丘 祈穀 常雩親宿齋宮之日各部院
仍照向例不進本章至 方澤 太廟 社稷致齋三日內除刑
部不必進本及各部院外省本章有關涉刑名者俱不呈進外其
餘尋常事件著該衙門照常進本卽以本年 方澤大祀爲始著
爲令○戊午諭太常寺衙門具奏 社稷壇恭謝雨澤請照春秋
祭祀儀注舉行會詢之該寺堂官據稱親詣 社稷壇祈雨舊儀
係由金水橋北步行前往至報祀向係遣官行禮並無親詣儀注
是以此次循照春秋親祭常例乘輿至 社稷壇北門外鋪設梭
薦處降輿等語但思祈求雨澤旣經步行祈禱若報祀之禮稍有
不同轉似得有雨澤略涉滿假朕何敢出此况朕從前隨侍 皇
考往 黑龍潭求雨 皇考至山門降輿升階數十級俱係步行
而上報祀之儀亦同節年從無更改試思 龍神尙如此申敬况

社稷壇典禮尤隆既經步禱自應步謝方足以申誠敬嗣後除
春秋祭祀仍照舊定儀注舉行外如遇祈禱雨澤及親詣報祀各
典禮均步行前往所有此次儀注著太常寺遵照改定具奏並載
入會典永遠遵行○額勒登保奏痛剿商雒賊匪得旨嘉獎賞還
額勒登保那彥成長麟台布花翎賞提督楊遇春雲騎尉世職副
都統銜格布舍恩騎尉世職○己未諭禮部具奏五月初一日夏
至 方澤大祀 高宗純皇帝升配事宜一摺於祭日先詣 高
宗純皇帝神牌前上香行禮尙未周備上年冬至恭逢 圓丘大
祀祇奉 高宗純皇帝神牌升配朕於前一日恭赴 天壇齋宿
卽敬詣 皇穹宇拈香隨至 高宗純皇帝神牌黃幄敬謹行禮
今春 祈穀升配前一日先詣 皇乾殿次詣 神牌黃幄禮節
亦同 方澤大祀 高宗純皇帝升配 地壇因每年例係在宮

內齋宿禮部請於祭日先詣 神牌黃幄行禮視 升配 天壇
禮儀尙缺先期致告一節朕心殊覺未安因思 地壇於乾隆十
七年初建齋宮 皇考曾詣齋宿一次彼時新栽樹木尙未成陰
隨從官員致有受暍者 皇考俯加體恤以後夏至 地壇俱卽
齋宿宮內祭日始詣 壇行禮此次 升配前一日自應先期致
告若禮畢仍行還宮於義未合若住宿壇內齋宮雖屬正理但隨
從之王公大臣侍衛人等車馬喧闐其時 高宗純皇帝神牌黃
幄恭設 北天門外相距甚近實不足以昭虔肅心實不安再四
思維惟有於前一日閱祝牌畢還宮辦事後朕由東華門恭赴
皇祇室拈香隨至 高宗純皇帝神牌黃幄行禮畢卽詣 雍和
宮齋宿其隨從王公大臣侍衛等亦可就近致齋朕於次早恭詣
地壇行禮庶 圓丘 方澤 升配前期致告之儀旣昭畫一

而禮緣義起節次更爲詳備著禮部遵照此旨於儀注內敬謹增載此次專爲升配增此禮節嗣後夏至地壇齋宿仍照舊例行○諭蔣兆奎奏伊年老有病難勝巡撫重任懇請簡員更換一摺蔣兆奎前在山西巡撫任內因年已七旬兼患怔忡予告歸里上年來京叩謁皇考梓宮經朕召見看其精力尙未就衰是以復用爲漕運總督彼時伊以年老懇辭朕因其平日操守廉潔未允所請伊赴任後辦理漕運將近一年聲名尙好惟於旗丁津貼不敷一節始則妄議加賦繼則請借給各幫船銀兩曉曉置辦殊不知漕一切加陋規何經降旨裁革復禁止糧道運弁侵扣漕費並敕部覈議於正兌改兌米石酌加津貼又加恩於應帶土宜外量予加增免其上稅旗丁用度已屬寬餘乃蔣兆奎之意總以非加賦借帑不能辦理屢次瀆陳經朕節次申飭伊卽懇請解任已失

敬事之道姑念其平日官聲清潔不肯卽加罷斥改授工部侍郎
伊來京謝恩在朕前猶以旗丁津貼究屬不敷於漕運恐有貽誤
堅執前見其實鐵保接辦漕運後並不見其掣肘各省漕艘俱各
依限開行銜尾前進朕密訪各幫漕船行走均屬安靜見已陸續
抵通並無遲誤可見蔣兆奎於漕運情形全不悉心體究輕聽屬
員之言逞其偏見自以爲是又復不肯承認受人愚弄其剛愎自
用之咎實無可辭朕猶念其曾任封圻於地方事務較爲熟諳彼
時適陳大文丁艱回籍一時乏人卽將蔣兆奎補授山東巡撫伊
到任後於該省吏治官方並未見實有整頓之處前因御前侍衛
明安往泰山進香回京奏稱東省地方官私餽贖儀八百兩並稱
沿途經過營汛墩房坍塌未見有兵丁駐守曾明降諭旨將蔣兆
奎等申飭昨據伊覆奏上年明安前赴泰山進香亦曾受銀八百

兩至守汛兵丁因明安乘馬馳行不及身穿號衣站班伺候等語殊不成話向來奉旨出差人員沿途驛站俱有傳單豫行知照豈有明安業已到境而汛兵尙未得信之理所奏實屬回護強辨復降旨申飭茲蔣兆奎遽因此事忿激求去試思如此執拗任性豈人臣事君之理乎况朕不過降旨申飭尙未將伊交部嚴議而伊卽抗章引退豈內外大臣有善必旌有過卽不應加之譴謫乎若臣工等皆似此相率效尤甯不成明季挂冠惡習此風斷不可長蔣兆奎在朕前尙敢如此其接見屬員辦理公務必更有偏執己見不恤人言之處安能飭吏治而得民心卽將蔣兆奎革職治罪亦所應得究念其廉名素著量予薄懲蔣兆奎著革退巡撫拔去花翎加恩降爲三品卿銜卽予休致將巡撫印篆交布政使全保暫行護理卽由山東起程回籍不必進京謝恩伊卽來京朕亦不

復召見回籍後惟當閉門思過以終餘年用副朕格外矜全至意

○以惠齡爲山東巡撫轉縕布爲兵部左侍郎以范建豐爲兵部

石侍郎

由直隸奉旨
鎮總兵遷

○庚申命各督撫定有司官自理詞訟期限

並禁書吏賄充○以擊敗穀城賊匪功授明亮三等侍衛○甲子

諭松筠上年在陝甘總督任內曾經條奏請將私鹽私鑄二項悉

行弛禁所見殊屬迂謬斷不可行本應降旨交部嚴議特以松筠

平日尙能持正爲有用之才是以不加深責特令軍機大臣親書

諭旨密爲訓飭卽軍機章京等亦未令聞知此乃朕欲保全松筠

不得已之苦心曾經詳悉示知而松筠自任總督以來屢稱患病

於一切防堵事宜並不能妥爲布置致任川省竄匪於今春闌入

甘境又不能實力攔截以致展轉奔突蔓延至今本應治以應得

之罪卽不至如魁倫之重較之倭什布之疏於防範其咎正復相

等甯不應予以降調處分猶念其居官聲名尙好且不似楚省之屢任賊匪竄入是以從寬免議令長麟接辦總督事務將松筠授爲伊犁將軍仍令赴湖北暫署督篆並令居首督辦剿賊之事而松筠甫經到楚仍卽稱病漫無展布輒行懇請陞見朕於伊初奏到時尙以松筠在彼或能得力未經允准而伊又稱有恩出自上之事必須面奏具摺懇請隨經降旨准行及松筠到京經朕日日召見面加詢問則其所欲面陳者仍係私鹽私鑄請寬例禁二項並無奇謀祕策經朕詳加開導平心靜氣反復譬曉以此事礙難施行松筠固執已見將此事又復具摺瀆奏並不由奏事處呈遞試思私鹽私鑄律有明禁係開國以來 祖 宗定制豈得輕議更張設朕有不循成法之意妄思更改在廷諸臣尙當直言極諫松筠安可以一人臆說妄欲紛更且卽如松筠所奏將私鹽私鑄

槩寬其禁則自鹽政以下各官皆當裁去另派專司鹽稅之官紛
紛更制且見在私鹽有禁不過官役巡攔尙有私梟拒捕等事若
設立稅口是向日販私者轉須交納官稅儻販私之徒逞其刁悍
不肯交稅又將如何辦理至川省若弛私鑄之禁則各省亦必相
率效尤豈有國家泉幣之權操之自下隳紀綱而弛法度莫此爲
甚而松筠以爲所鑄係嘉慶通寶卽非私鑄是何言耶且分設各
廠聚集多人更恐釀成事端其流弊將不可勝言又賊匪卽有私
鹽私鑄之徒聞風散出爲數亦屬無幾此外如松筠摺內所稱咽
匪賭棍及白蓮教匪又豈皆令其各回本地作奸犯科乎是所奏
種種紕繆實爲迂腐無識儻朕輕聽其言貽誤不小且似此議論
紛紜豈非謀夫孔多是用不集之明驗乎若將原摺發交大學士
九卿覈議自爲公論所不韙必將松筠議以變亂成法之罪革職

示懲今朕姑念松筠所言雖屬失當而其心究爲國家公事尙屬無他是以仍令軍機大臣明白傳知不復交議松筠經朕指示雖自知糊塗冒昧懇請仍赴軍營效力但伊平素未經行陣弓馬平常帶兵旣非所長卽令督率防堵而伊前在陝省時一任川匪竄入甘境其不能實力堵禦已可槩見至於辦理糧餉松筠前此雖未請撥帑銀屢將解川餉項路經陝省者任意截留至九十餘萬之多亦未見經理得當是松筠前往軍營實屬無益而似此識見迂疏亦豈能勝伊犁將軍之任松筠著加恩賞給副都統職銜前往伊犁作爲領隊大臣並賞戴花翎替換珠爾杭阿回京其伊犁將軍員缺仍著保甯實授俟閒放有人再行更換松筠當力改前非隨同保甯學習辦事以期稍贖罪愆無負朕格外矜全教誨至意○乙丑諭刑部題覆直隸省民人王仲貴毆傷胞兄王仲香身

死一案聲明倫紀攸關將王仲貴依律擬斬立決細閱本內情節王仲香調戲伊弟妻張氏欲圖強姦已屬亂倫傷化迨經伊父王尙才斥詈不服將伊父揪倒欲毆尤屬目無倫紀及伊弟王仲貴聞聲趨救王仲香竟欲與伊父拚命兇惡已極伊父王尙才忿極喝令王仲貴毆打王仲貴央求不允並聲言如不代毆卽欲尋死王仲貴無奈隨用石毆王仲香額顱殞命是王仲香淫兇殘忍種種蔑倫所犯應死之罪不一而足及王尙才喝令王仲貴毆打伊兄復經王仲貴代爲央求尙有不忍致死其兄之心因王尙才不允王仲貴始用石毆傷致斃迺逞兇干犯可比乃刑部照原題於奉父命毆死蔑倫之兄者仍依弟毆兄致死本律擬斬立決並聲明倫紀攸關措詞不當殊失情理之平且與維持風化之義未協所有王仲貴一犯著卽改爲杖一百流三千里不必再交九卿

覈議嗣後遇有此等死者自犯蔑倫之案著刑部卽行覈議奏明
請旨減等著爲令○丙寅諭費淳等奏六安州知州員缺緊要該
省實無人地相宜合例堪補之員仍懇以宋思楷補授等語已照
所請行矣向來各省州縣要缺往往以人地相需將不合例之員
專摺奏請升調及交部議駁後而督撫等仍以原請升調之員復
行具摺奏懇此等人員如果於該省要缺實在相宜若不准其所
請則督撫等無由收指臂之效但一經部駁又復奏懇准行如此
竟成故套在辦事公正之督撫原屬爲缺擇人而稍涉偏私者未
免爲人擇缺致啓夤緣奔競之漸不可不明示防閑以杜流弊嗣
後各省督撫於部駁不合例之員復行具奏懇請允准者竟當責
令保其終身無論將來該員仍任原省或升任他省若不退因公
罷斥尙可免其追問如係貪污獲罪則原保之督撫自難辭徇情

濫舉之咎著吏部嚴定處分用昭懲儆宋思楷卽著照新例行○
諭祖之望奏審訊桂東縣民扶咸欽呈控李羽儀等窩留逃犯私
開鐵廠等事俱屬虛誣將扶咸欽問擬軍罪一摺已交該部覈議
具奏矣扶咸欽因挾李羽儀等從前控拆鍋廠之嫌架捏重情赴
京呈控自應按律坐誣抵以軍罪其扶家嶺等處山地所開鐵廠
亦當查明飭禁永絕爭端此等赴京控告之案從前往往往令欽差
前往審辦原以杜該督撫回護瞻徇之弊在公正廉潔之欽差自
能屏絕苞苴秉公審斷其不能檢束者不獨沿途需索驛站陋規
竟有收受餽送屈法徇情之事卽欽差尙知自愛而跟隨人等勒
索使費供應擾累地方州縣辦差家人長隨等亦藉端濫行開銷
均所不免朕深悉其弊自親政以來遇有各省民人赴京控案不
肯輕派在京大臣前往審訊卽交原省督撫就近查辦乃年來各

督撫等於交辦案件率以審係虛誣一奏塞責而被告審實問罪者寥寥試思若非抱不白之冤豈肯自出己貲遠赴京師呈控難云盡屬子虛是該督撫等非庇護所屬卽有意從輕所審案情未可盡信朕又不得不用欽差矣嗣後發審之件若該督撫不據實秉公審辦希圖蒙混結案致原告之人稍有屈抑一經訪得確實或被人舉發或欽差覆審必當將原審之督撫從重治罪決不姑貸將此先行通諭知之○申諭各督撫毋濫用驛遞○丁卯以王汝璧爲江蘇布政使方維甸爲山東按察使由內閣侍讀學士遷○戊辰諭勒保奏審擬阿迪斯請發伊犁充當苦差一摺阿迪斯經朕簡放成都將軍到川後惟知株守大甯擇一無賊處所駐紮經朕節次嚴飭自知獲咎已重並接到魁倫令伊勦辦川北賊匪咨會輒以感冒風寒足疾愈劇不能騎馬帶兵具摺懇請罷斥種種遷延避

賊是以降旨將阿迪斯革職拏問交勒保提至軍營審訊今據勒保奏阿迪斯所稱左骹墜馬跌傷左膀骨挫不能騎馬之處親驗屬實並據阿迪斯泣訴伊父阿桂在日因伊糊塗無能曾經屢次訓誡不宜外任等語其意不過欲提及伊父希冀朕垂念舊臣寬其罪責伊父在日既有此語阿迪斯於上年派令署理古北口提督時卽未經奏及迨簡放成都將軍何以並不據實陳奏若彼時卽諄切懇辭朕亦必另簡他員不令阿迪斯前往乃於簡用時默無一語心存戀職而見獲重咎則又訴伊父遺誡以圖減罪有是理乎朕卽念伊父阿桂舊日勤勞而阿迪斯不能勉承父訓自蹈重譴亦斷難曲法寬宥阿迪斯著照勒保所奏發往伊犁充當苦差此尙係朕憐念阿桂不忍重治其子之罪亦欲令勸舊大臣之後嗣不能承受恩眷者知所儆也○諭上年秋閒因張漢潮一股

賊匪在陝竄擾特派那彥成前往督兵勦辦那彥成未至陝省張漢潮先經明亮殲斃所餘逆黨止係擊敗之賊無難乘勢殲除乃那彥成於賊匪竄入老林後漫無展布惟知帶兵入林跟蹤尋覓徒疲兵丁涉歷三冬並未與賊接仗一次轉任賊匪西竄甘境而川省各股賊匪紛紛闖入陝境那彥成係特派大臣在陝居首帶兵之人又不能設法擱截聞額勒登保帶兵赴甘伊亦徑趨甘省惟在龍山截勦得一勝仗仍未將餘匪勦淨旋因竄匪折回陝境額勒登保先行帶兵赴陝那彥成專辦甘境高二馬五等賊雖得勝仗仍未勦殺淨盡任此股賊匪竄入川境僅交與總兵百祥接辦伊棄垂敗之賊領兵赴陝致高二馬五一股賊匪在龍安地方日漸鴟張至今未能殄滅皆由那彥成玩縱所致彼時若那彥成緊躡賊蹤前赴川境自可將此股賊匪速行殲除卽在川省幫同

德楞泰勦賊未爲不可乃必欲隨同額勒登保先後入陝自係那彥成不肯幫助德楞泰又欲分額勒登保之功此等淺見薄識豈大臣所宜居心前此那彥成奏到時朕卽以其所辦錯謬傳旨訓飭今高二馬五尙在川境竄擾而總兵施縉竟因勦賊陣亡以零星殘敗之餘匪聽其入川復行裹脅滋擾致令打仗出力勞績最著之施縉臨陣捐軀實爲萬分不值而追溯失事之由皆因那彥成輕率貽誤此而不加之懲治何以服人那彥成著退出軍機大臣不必在南書房行走亦不准在紫禁城騎馬伊如此猶豫無能亦斷難兼理各處事務所有原充之 實錄館正總裁國史館副總裁文淵閣提舉戶部三庫總管內務府大臣茶膳房造辦處總管工程處均著革去止留工部尙書鑲白旗漢軍都統及經筵講官銜伊所戴花翎前於革去後復經賞還仍准戴用此係朕推念

阿桂舊日勤勞又因阿迪斯見在獲罪已革去所襲公爵成都將軍發往伊犁充當苦差若再將那彥成革職治罪則阿桂之子孫竟無身任大員者是以姑示薄懲那彥成惟當倍加感奮痛改前非勉圖後效以副朕教誨矜全至意○嚴飭督撫毋回護州縣處分○辛未申諭各部院及各督撫嚴察書吏○壬申諭朕恭聞

皇考高宗純皇帝實錄以大學士趙國麟向有足疾不能騎馬著坐車進紫禁城到內閣辦事仰見 皇考體恤癯病老臣至爲優渥因思見在大臣中曾經賞給紫禁城騎馬者在滿洲蒙古大臣於乘騎素爲嫻習而漢大臣則乘馬本非所長設遇衰年有疾仍勉強策騎入朝未免轉形勞頓嗣後除滿洲蒙古大臣外所有漢大臣曾經賞馬者或偶因患病或適有足疾不能乘騎著自行具摺奏明准其坐車進紫禁城至向例下馬處下車疾愈後仍照常

騎馬以示朕眷念耆臣恩加無已至意○癸酉以秦瀛爲浙江按

察使

由杭嘉湖道遷

○甲戌申禁京城內外及各省民人越境酬神○

盛佳緣事革職以額勒布爲戶部右侍郎○乙亥諭上年因貴州學政養廉本少該省距京較遠學政延請幕友需費稍多該省舊有紅案陋規銀兩以資用度會降旨予以限制不得過五六兩之數其實在無力者卽當減免不得強令交納今思此項紅案銀兩究係陋規學政本不應得受雖予以限制但既有此項名目難保日久不又逐漸加增上年所降諭旨係朕一時思慮未爲周備該省學政養廉本係三千二百兩著該撫於貴州省藩庫閒款內加恩酌增五百兩俾資辦公此後該省紅案陋規銀兩著永行禁止不得收受分文至其餘各省學政例給養廉本屬敷用其向無紅案陋規者自不得違例索取若向有此項陋規俱著一體飭禁儻

有仍前私受者一經查出或被糾參必將該學政按例治罪○己卯以明亮爲湖北宜昌鎮總兵官○以攻勦楊開甲等賊匪功賞恆瑞雲騎尉世職扎克塔爾恩騎尉世職○庚辰撥部庫及廣儲司庫銀四十萬兩備四川軍需

五月壬午朔夏至祭地於方澤恭奉高宗純皇帝配享○定將軍副都統親隨領催兵丁額○癸未諭繼善奏四五品等官停止驗看請照三品京堂一體帶領引見等語所奏甚是向來四五品京堂及翰林院讀講學士並左右庶子等官每遇京察之年係吏部開列王大臣名單請旨簡派驗看分別等第由吏部帶領引見但此項人員職分較大俱係朕特加簡擢伊等與王大臣向無交涉事件又無統屬其賢否何由深知所定等第亦未必確當況於驗看後仍須帶領引見又何必多此一番驗看爲耶嗣後四

五品京堂及翰詹學士等官卽照三品京堂之例一體帶領引見不必由王大臣驗看著爲令○丁亥諭昨給事中邱庭澍奏嚴禁僭用帽頂一摺已降旨飭令各按品級戴用矣因思國子監學正學錄及各省教諭訓導等官有係進士舉人出身者進士舉人例應截取選用知縣其頂帶本係七品而學正等官則係八品若按品級而論該員等得官後轉須降換頂帶似未允協再九品及未入流應用起花銀頂一項向來未見戴用此等微末之員若令其一時更換勢須紛紛製辦亦多繁費著吏部另行詳議具奏尋奏由進士舉人除授八九品小京官及教職者均用素金頂由進士舉人出身除補佐雜等官者帽頂均照見任品級至九品未入流例用鏤花銀頂究係職官與生監有別應令八品官用陰文鏤花金頂九品未入流用陽文鏤花金頂報聞○己丑以殲淨陝西逆

首劉允恭劉開玉擒獲賊目王洪儒功晉額勒登保三等子○壬辰諭軍機大臣等本年四月內據長麟台布前後奏到移兵陝省邊界及江口一帶分段堵禦閱所開單內和星額王文雄索費英阿長春汪啓王文湧等各員俱在陝省西南一帶分段駐守統計所帶兵勇不下一萬四千餘名彼時因賊匪本欲竄赴河南西南兩面設卡安兵斷其後路而東北兩面全無遏禦是欲偏令賊匪全趨豫境因降旨將額勒登保那彥成長麟台布四人拔去花翎嗣因額勒登保在商維一帶痛殲賊眾賊勢已向西趨距豫漸遠卽將伊等花翎俱行賞還續復據額勒登保奏楊開甲一股賊匪竄至鄖西經恒瑞扎克塔爾等帶兵追擊東面又有額勒登保等截剿賊折向西竄朕方以西南一帶有長麟等所派重兵堵禦正可乘勢夾擊殲除淨盡乃本日台布摺內轉稱此時江口情形比

前著重且距盤匡七百餘里僅有長春雜昂一路兵勇難以兼顧之語然則伊等四月閒所奏布置各兵今俱何往豈此項駐兵續行撤去或別有調遣抑竟係長麟台布前此所奏全係紙上空談若果如此則伊等之罪無可逭且昨據額勒登保奏報張漢湖一股餘匪全行掃蕩見赴洵陽一帶追剿各股賊匪已知會長麟令其從孝義鎮安一帶前往江口兼調甘涼兵二千名於要隘安設以資堵禦並知會台布移駐興安就近督辦糧餉策應照料額勒登保之摺乃五月初一日拜發台布近在同省豈有於五月初四日發摺時尙未得信之理而伊摺內僅稱約計長麟距省二百數十里亦係懸揣之詞究竟總督駐紮何處並未知悉看來該省巡撫與總督聲息全不相通督撫又與經略不相聯屬伊二人互相推諉竟係有心貽誤長麟台布均著傳旨嚴行申飭長麟台布於

無賊地方則以布置堵禦情形虛詞陳奏及至賊匪竄近則又稱兵力不敷此時新調甘涼兵二千又交長麟帶領豈又在無賊處所擬兵自衛耶賊匪見在向西奔竄伊等自必奏稱派撥兵勇防堵東西與前此西南兩面布置情形相等萬一賊勢又復折而向東又必以無官兵堵禦爲詞似此賊去有兵賊至無兵其所奏豈復可信伊等於防堵事宜毫無調度一任賊匪往來奔竄全不先事豫籌惟知以請撥餉銀爲事總之長麟台布如能屏除私見督率防範俾經略追賊所到之處有兵截擊得以殲淨賊匪若仍前遷延觀望是額勒登保帶兵不能得力皆伊二人貽誤所致則長麟台布之罪較魁倫尤重勿以身輕爲嘗試慎之○丙申免四川教匪滋擾之射洪等十七廳州縣額賦緩徵安岳等六州縣額賦及鹽課茶稅○戊戌撥部庫銀五十萬兩備陝西軍需○額勒登

保奏追剿伍金柱大股賊匪得旨嘉獎賞犒兵銀五千兩○甲辰定刑部覆議命盜案期限○乙巳諭軍機大臣等甘省高二馬五等股賊匪前據勒保奏已全數偪入番境自投絕地滿望勒保乘賊窮竄之時悉行剿淨乃辦理多日又任賊匪由黑河口一路展轉奔突調度不善著先行革去花翎以示薄懲至參將增順前於賊匪由哈爾寨草地溝一路竄入川境時係伊代辦松潘鎮事務疏於防範實有應得之罪今賊匪又從伊安設營卡處所衝出增順既不能奮力截擊竟退回南坪是其疏防玩誤獲罪甚重著卽在軍營正法並傳帶兵員弁看視行刑俾知儆惕百祥係督防大員不能豫爲督飭防範著降爲參將至托津廣興見已飭令回京其達州辦理糧餉事宜應於楊揆先福劉清三人中酌派前往接辦○丙午諭朕自上年親政之初辦理和坤等一案彼時那彥成

本係軍機大臣朕看其應對明白似有出息且係原任大學士公阿桂之孫原冀其克繼家聲以備任使是以疊次加恩擢用尙書都統派令管理戶部三庫崇文門稅務及各處事務較他人爲多實欲造就成材並非偏厚於那彥成也伊於該管部旗及各處事件均非一人獨辦尙未見短每日召見時於朕籌辦軍務宵旰靡甯一切皆其所深悉嗣緣勒保明亮等先後獲罪軍營乏人更換朕以那彥成正當壯年應有志上進况曾目覩 皇考爲軍務焦急直至 龍馭上賓之日未能解釋渴望伊去督辦或能蕝事以慰 在天之靈減朕之咎是以派赴陝西軍營授以欽差大臣關防代明亮統領一路軍務那彥成亦直任不辭而陛辭之前屢次陳奏伊到軍營後如不能卽時打仗求免催促俟可以打仗時卽不遺餘力奮勇直前等語豫爲站腳地步彼時朕心卽覺不愜然

業已派令前往亦無忽行中輟之理那彥成出京後途間行走已屬遲緩及到陝省接勦張漢潮餘股漫無布置惟尾隨賊蹤深入老林遷延歲月迄無成效其時大兵俱在山內展轉跋涉此外全無官兵是以川省之賊乘閒竄入甘境那彥成如果能及早分派官兵於陝西邊界悉力截勦賊匪自必仍折回川西額勒登保即可無庸赴甘將川省之賊得以一手督辦不必交付魁倫斷無任聽賊匪竄過嘉陵江潼河擾及川西完善地方之事無如那彥成惟知在老林盤旋全置他賊於不顧遂致竄甘之賊日久蔓延川東川北之賊竄渡川西額勒登保不能兼顧魁倫因是獲罪雖經德楞泰在川西疊次勦殺賊匪仍行竄過嘉陵江以東荼毒無數生靈費卻無限兵力僅能將四川之賊截回若溯其失算之由皆那彥成在老林耽延所致用人不當朕深引以爲咎當額勒登保

督兵赴甘時張漢潮餘黨業由老林逸出那彥成屢奉嚴旨始帶兵往甘省截剿惟於龍山得有勝仗殺賊尙多此後額勒登保追賊入陝那彥成在甘專辦高二馬五一股雖亦有斬獲而餘匪數百人由甘省白水江竄渡闌入川境那彥成並不緊蹙追剿乘其衰敗一鼓掃淨輒將此股賊匪委之總兵百祥徑行帶兵赴額勒登保一路以致高二馬五等賊竄近龍安復行裹脅幾擾及附近省會地方經勒保督同鎮將等屢次堵剿致將奮勇得力之總兵施縉因此陣亡賊匪被官兵剿急仍由松潘番地竄近甘境見在阿哈保等帶兵繞截是否能攔回川境剿淨此股尙未可知此皆那彥成棄垂敗之賊留遺餘孽以至於今也朕因那彥成在軍營不能得力且恐掣他人之肘是以召令回京以便詢問軍營實在情形其在老林內耽延之罪縱賊入陝甘之罪及縱賊入川之罪

僅予薄懲將軍機大臣及所管各處事務斥退仍留其尙書都統
各大缺並准戴花翎留經筵講官銜乃係格外加恩朕曾面諭在
京軍機大臣等方以那彥成接奉召回之旨自必懇請仍留軍營
卽虛詞敷衍亦必應如此而朕亦斷不允所請必令來京乃那彥
成得旨召回卽束裝就道摺內並無懇留一語到京之時連日召
見朕微試其意亦總未懇請復行前往是其視軍營爲畏途肺腑
如見迫朕細詢軍務情形語及添兵則以各省無用之兵添調何
益語及添餉則以如此虛糜餉項殊屬不值至辨賊之道不外堵
剿二者那彥成則以官兵追剿賊匪愈遠愈疲勢難剿盡語以防
堵機宜伊又以爲兵勇皆疲堵亦無益前因楊開甲一股竄至洋
縣地界王文雄帶兵截剿其由白沙河踰渡之賊有把總王培連
赤身扛礮淌水轟擊不令過江西竄朕方加之獎許而那彥成則

以爲不如聽其竄往川境又戴家營一股賊匪竄至黑河有欲趨
徽縣兩當之勢朕卽令楊遇春定住分兵繞道前往攔截那彥成
轉以爲不如縱令入甘地勢較平轉易辦理若果如此則那彥成
前在甘境辦賊何以不行勦淨又任其分竄川陝乎那彥成似此
措語游移毫無把握已非奏對之體乃昨復召見詢以陝省賊情
據稱皇上洪福自能剿竣賊匪譬如蝗蟲非人力所能捕淨況此
事總關劫數如果劫數已盡卽見在守卡無用之兵一人亦能殺
賊十數人若劫數未完卽有健將如扎克塔爾慶成等帶領精兵
亦不能得力此何語耶聞之令人寒心朕又論及額勒登保見今
連次得勝之事那彥成復以額勒登保所奏如果不虛再得一二
仗卽可將陝賊辦竣其意不過因伊甫離軍營額勒登保卽連獲
勝仗心懷妒忌爲此將信將疑之語欲朕猜疑額勒登保阻其成

功此等居心豈能逃朕洞鑒試思那彥成於前月二十七日自軍營起程額勒登保卽於是日督兵奮剿將張漢潮餘黨之在陝者先行辦竣旋於手板崖嶺得勝仗又將伍金柱一股助惡之首逆龐洪勝殲斃前後殺賊幾及五千人豈竟全不可信且詢以川楚軍營情形據云全不知悉恐亦不免虛誑等語豈德楞泰將川西之賊痛加剿殺截回川東川北亦全係子虛乎那彥成游詞父聽其心實不可問若如伊所云一切堵剿傷屬無用兵餉亦不必添惟委之劫數聽賊自斃此乃心存膜視袖手旁觀竟似事不可爲置身局外者那彥成身爲大臣又係阿桂之孫受 皇考及朕厚恩至爲優渥何忍爲此搖惑人心之言尙得謂之有天良耶朕召見軍營回京之人原以其身歷行間見聞自確與懸揣臆度者不同冀其稍有盡策贊助萬一卽如松筠亦係朕由西藏召回擢任

陝甘總督因其辦理未能妥協調任伊犁將軍又因楚省帶兵乏人令其暫署督篆同明亮等勦辦楚境賊股而松筠奏稱患病不能督戰懇請來京面陳軍務朕不得已姑允所請及至到京詢以方略惟屢請將私鑄私鹽全行弛禁以斷不可行之事演奏不休然伊於軍務情形則以團練鄉勇裁撤疲兵及分路堵剿爲要尙非漠不關心毫無所見是以僅示薄懲將伊降爲副都統職銜前往伊犁作爲領隊大臣乃諒其愚悃曲加寬貸若那彥成屢次奏對無一言確實全係一片私心初次召見時尙自認無能負罪引慝繼則毫無愧懼矢口亂道率爾而對豈竟以此等伎倆在朕前嘗試乎朕之初心未將那彥成全行斥革者原係逾格矜全望其悔過自效亦因簡任大臣不欲輒行更易乃朕用人不得已之苦衷若大臣等不知體朕心必欲激朕之怒朕亦非不能剛斷之主

也著將此旨交儀親王成親王大學士軍機大臣會同六部滿漢
尙書向那彥成宣示令其明白登答由軍機處代奏若伊另有密
奏之語亦令其自行書寫封交軍機處轉呈看伊有何分辨俟奏
上時再降諭旨○諭刑部覈覆屯居漢軍庶吉士趙繼昌與袁鳳
瑞之妻袁趙氏通姦將袁鳳瑞誣欠控縣偏令退婚照依該督原
擬將趙繼昌發往極邊煙瘴地方充軍一摺趙繼昌從前會試中
式進士時朕卽聞其文理不通外間噴有煩言是以告假多年不
敢銷假散館此時若嚴行究辦必致又成大獄因事屬既往姑免
追求至此案情節趙繼昌認袁趙氏爲義女調戲成姦迨袁趙氏
出嫁後屢經姦占甚至捏控袁鳳瑞借欠錢文偏勒退休收納爲
妾刑部照原議以袁趙氏先與趙繼昌通姦父母利賫縱容非良
家婦女可比又趙繼昌收納爲妾在袁鳳瑞退休之後亦與強占

不同援照兇惡棍徒生事擾害良人例問擬遣戍第袁趙氏若果先被伊夫袁鳳瑞斥其不端自行休棄趙繼昌因而買娶爲妾尙得以本非強奪量爲末減今趙繼昌誣陷伊夫袁鳳瑞用計逼勒退休卽與強占無異擬以煙瘴充軍尙覺法輕情重趙繼昌應卽比照強奪良人妻女姦占爲妻妾例定擬絞候入於秋審辦理至該犯原係告假庶吉士久經在屯居住其失察之該管旗分大臣參領佐領固應照例議處但翰林院掌院及教習庶吉士各大臣有稽察訓課之責於趙繼昌告假期滿卽當催令銷假散館如看出文理荒謬不能應試卽可據實參辦何得任其藉假遷延致倚恃職官聲勢姦淫橫肆彼時該掌院教習均有不合著該部查取職名一併議處餘依議○諭刑部遵旨將從前獲罪官犯子嗣不准應考出仕及原案並無不准應考出仕官犯子嗣分別開單具

奏朕詳加披閱內陳山崑係陳輝祖之子陳輝祖在總督任內聲名固屬平常但如吏治關九漕務武備廢弛究係空言卽如查鈔王亶望案內抽換抵兌一事亦不過卑鄙見小又楊烱係楊景素之子楊景素在總督任內聲名亦甚平常但尙無破案實據又另單所開之高稹高棚高積均係原任廣東知府高綱之子高綱爲僧潛歸製悖逆文集序文並募費刊行將該犯等發遣此不過比照大逆緣坐辦理與實犯不同其原任布政使錢度之子錢邨不過隱匿伊父查鈔財產原任海州知州邨承顯之子邨嘉葬邨德葬邨圖葬三人尤不過於應繳伊父借支銀錢糧石等項拖欠未完覈其情節均尙可原陳山崑楊烱高稹高棚高積錢邨邨嘉葬邨德葬邨圖葬均著加恩准其出仕應試至年羹堯大逆不道子孫本係永遠不許爲官巴忠辦理廓爾喀軍務貽誤子孫二三代

內不准居官其王直望等係甘肅捏災冒賑侵蝕錢糧禍崧係婪索多贓虧缺庫項情節俱重其子嗣應仍不准出仕應試至另單內官犯子嗣文敏等祖父各原案或遇賊退縮從軍脫逃或貽誤軍機挾詐飾欺或贖貨營私貪污敗檢或侵盜賞賜外藩銀物情罪均屬重大其子嗣業經釋回准令充伍食糧已屬從寬豈可令其復登仕版文敏等亦一併不准出仕應試○丁未諭州縣爲親民之官必須官民相習始於地方有益朕聞近來各省督撫於州縣缺分往往計其肥瘠展轉調署以致各州縣多非本缺其中爲公事通融調劑者亦所時有而上司愛憎所屬爲人擇缺者居多勢必本缺署缺皆易生手兩有貽誤於吏治大有關係此弊各省皆有而廣東尤甚各督撫等如果爲人地相需起見何不奏明更調乃任意高下其手致啓屬員夤緣趨避之端其風斷不可長況

州縣違例調署督撫等原有處分自當通行飭禁嗣後各督撫等調署州縣若不具摺陳奏一經部中查出或被他人參劾必將該督撫等交部嚴議將此通諭知之○諭那彥成外似有才中無把握見機遲鈍遇事狐疑不聽人言自以爲是此次軍前參贊雖有微功不能掩咎本應革職發往伊犁效力贖罪但阿桂之子孫半年之內俱行遣戍朕心實有不忍伊等縱不念乃祖乃父朕豈可不篤念老臣乎那彥成在外不能決勝千里在內不能運籌帷幄洵爲無用之物分宜置散投閒著革去尙書都統講官花翎格外施恩用爲翰林院侍講在 實錄館效力行走八年無過方准食俸至於軍營情形較前大有起色兵精糧足帑藏充盈額勒登保等三人實能殄寇秋冬之閒必可收功內外諸臣除軍機大臣外毋得干與軍務務言煽惑違者不貸○諭工部尙書員缺著琳甯

補授鑲白旗漢軍都統員缺著張承勳補授張承勳所遺正黃旗
漢軍副都統員缺著那彥寶補授那彥寶係阿桂之孫其才具雖
屬中平但見在阿迪斯於成都將軍任內獲咎已發往伊犁效力
贖罪而那彥成又革去尙書都統用爲翰林院侍講職分較小即
如和珅身獲重罪伊子豐紳殷德尙係固倫額駙授爲散秩大臣
福康安歷任封疆簠簋不飭伊子德麟見尙承襲貝勒阿桂乃勳
勞舊臣其子孫轉無一二品大員朕心實有不忍是以將那彥寶
擢授副都統俾資造就伊惟當感激奮勉力圖報效切勿稍存自
滿以副朕眷舊施恩至意○戊申免陝西教匪滋擾之渭南等四
州縣賦課○庚戌諭軍機大臣等阮元等奏艇匪驟入浙境卽馳
赴台州督飭防剿一摺自應上緊接捕竭力堵禦仍行偪回閩粵
洋面以便該二省迎頭截剿斷不可令其登岸致沿海居民猝被

滋擾朕聞浙省海疆土盜甚多艇匪鳳尾蔡牽等幫肆行勾結爲害押人勒贖更有奸民通盜南渡之姚家洲爲最地方官總因處分太重故不嚴辦阮元尤當嚴行查察勿令潛行勾結並嚴禁沿海匪民接濟糧米淡水等物李長庚向來在洋捕盜素著威望曾經賞戴花翎此次追剿艇匪應令溫州黃巖兩鎮聽其關會協同策應以期號令專一肅清洋匪○辛亥諭軍機大臣等此次徐德等大股賊匪向富陽等處奔竄經明亮等奮力截剿多有斬獲並因大雨時行河水長發賊匪不能徑渡向仙居等處奔竄卽可信歸山內聚而殲洗姜晟厚集鄉勇在南漳一帶堵截伊等合力同心覽奏殊深欣慰至續調之廣東廣西各兵一俟楚賊剿淨卽當令其全數速赴額勒登保軍營以資調撥

六月癸丑諭台布奏緊遏西鼠賊匪設法解散裹脅一摺賊家營

賊匪前經官兵勦殺分股由黑河竄甘肅台布奏係由索費英阿
汛地逸出除將索費英阿革職交額勒登保查訊外至台布彼時
在陝境西面往來彈壓未能督率將弁嚴爲勦截咎實難辭而捐
內並未自行請罪且辦理糧餉最關緊要今於經略額勒登保大
營在袁家莊剿賊竟致糧運缺乏所辦何事本應將伊革職發往
伊犁惟念台布在陝經年甫知頭緒一時乏人更換是以姑從寬
貸台布著革去頂帶仍交部嚴加議處以觀後效至長麟前經額
勒登保知會在陝西東面帶兵防堵而本日額勒登保台布奏摺
內並未聲敘長麟在何處堵截且伊係本省總督索費英阿不能
將戴家營賊匪攔截致令由黑河奔竄皆由長麟派委非人所致
亦應革職治罪姑念長麟所駐之處距黑河稍遠較之台布之近
在西面未能堵截者尙屬有閒長麟著拔去花翎仍交部嚴加議

處以示薄懲長麟合布惟當倍加愧勉於堵剿糧運事宜認真妥辦以期稍贖前愆儻再有貽誤必將伊二人從重治罪不能再爲曲宥也○甲寅諭上年九月 皇考高宗純皇帝升祔後朕於孟冬時享歲暮祫祭恭詣 太廟行禮而 奉先殿尙未經特祭恭讀 皇考御製詩集註內詳載乾隆戊戌年因 孝聖憲皇后升祔後未經 親祭 奉先殿特於是年孟秋之朔 親詣致祭而孟秋時享 太廟循例遣王恭代朕思中元爲祭祀之辰朕本擬恭詣 裕陵致祭因查乾隆二年 皇考曾經降旨以秋令正值禾黍暢茂恐致扈從人馬踐踏是以未經前詣 泰陵朕自當敬守 前謨不敢過禮至 奉先殿致祭則有 皇考成例所當倣法遵行今朕特於中元恭詣 奉先殿前殿讀祝致祭以申誠敬所有應行典禮著該衙門照例敬謹豫備俟 奉先殿祭畢再恭

請 壽皇殿拈香行禮其孟秋時享 太廟仍照例遣王公代朕

○丙辰撥江蘇藩庫及淮揚各關銀三十三萬兩並揚山等縣倉貯麥豆一萬三千石展賑蕭場二縣水災○丁巳命江西碾米十萬石備陝西平糶○壬戌勒保奏連日以來與司道悉心商榷就目前軍務情形而論川東川北往來奔竄之賊不下十餘股而剿賊之兵僅臣與德楞泰兩路刻下既無可調之兵又無添兵之餉自應遵旨通查受傷患病弁兵飭歸原伍以節糜費此外兵力不敷通飭各州縣團練鄉勇以資堵截團勇與鄉勇有別如隨營打仗防守卡隘官給鹽菜口糧聽候調撥者謂之鄉勇百姓等自出己貲修築堡寨擇其中年力精壯各備器械里民自行捐給口糧以爲守禦者謂之團勇爲今之計各路隨營鄉勇雖不能十分得力然查詢道路探聽賊情亦不能槩行裁撤且恐猝然刪減流而

爲匪不可不防惟有從此停止招募自可日見其少無虞糜費至
防守地方鄉勇如嘉陵江口一帶地方緊要亦不得不官給鹽糧
此外各州縣零星守卡鄉勇擬令悉行歸併鄉勇仍設立團長首
領名號如果能殺賊立功隨時奏加獎賞至糧餉事宜川省每年
額徵正雜各款計算支發滿漢官兵俸餉新疆臺費等項尙有不
敷近年被賊州縣屢蒙蠲緩僅有十分之五倍形支絀辦理軍需
惟有民間津貼所謂津貼者如運糧腳價臺站夫馬官價不敷由
百姓出資幫貼而川東川北悉經賊匪蹂躪已逐漸停止迨賊過
遼河川西完善之區又去其半其未經被賊之處不過四十餘州
縣未免漸形拮据所幸本年雨水應時收成豐稔川省民田寬廣
賦比他省較輕量加津貼尙屬可行亦應責成地方官妥爲經理
毋許吏胥稍有影射諭軍機大臣等各處團勇原令其各保里閭

自爲守禦但近聞各處團勇往往因賊經過堡寨懼其攻破將糧食等物擲給賊人冀免蹂躪此則顯然助賊必當嚴行飭禁著勒保徧加曉諭如有私自助賊者定卽查拏按律治罪至民間津貼之事原屬不得已之舉但如川西川南等處素稱繁富之區今歲則嘉陵江潼河附近各州縣被賊焚掠之處甚多地方情形迥不如前若一切費用咸取資於津貼恐不肖州縣吏胥辦理不善或致藉詞勒派別生弊端雖該省軍需浩繁不能不稍資民力然必須酌覈情形妥協經理不可專恃此項辦賊尤不可任聽屬員需索侵漁肥己○額勒登保奏藏斃逆首楊開甲得旨獎賚○丁卯允廷臣請編 御製味餘書室詩文全集○命董誥以大學士管理刑部調張若淳爲刑部尙書以汪承霈爲兵部尙書馮光熊爲左都御史轉陳萬全爲兵部左侍郎以平恕爲兵部右侍郎○調

陸有仁爲刑部右侍郎莫瞻菴爲工部右侍郎○甲戌諭魁倫自上年署理吏部尙書時常蒙召見屢請前往四川軍營並以伊從前曾在四川營官於辦理咽喉匪時擒捕奮勇會將咽喉匪辦淨見在教匪滋事尙不似咽喉匪之難辦乃遷至數年尙未蒞事皆由帶兵大員等因循貽誤所致若令伊前往必能剋期奏績彼時朕卽以其言大而夸未允所請嗣因勒保以總督辦理經略事務難以兼顧且安坐達州於剿捕事宜未能經理要善是以將勒保革職治罪改授額勒登保爲經略川督一時乏人因念魁倫在川年久又曾任閩浙總督於地方事務自應諳曉特命伊前往署理四川總督並委以軍旅重寄上年冬底川省賊匪由陝竄甘其時額勒登保有鑒於勒保之株守不動遂於本年正月初一日由達州帶兵前赴甘省彼時四川別無大員額勒登保因將川省零星賊股交

與魁倫接辦若魁倫自揣不能勝任卽應阻留額勒登保不令前往或據實奏明請旨定奪乃竟直任不辭復於達州地方逗留八日以置辦兵丁衣履爲詞又復繞道行走以致賊匪乘閒搶渡嘉陵江以西荼毒無數生靈魁倫並不親身督勦僅派阿哈保朱射斗前往追躡又不妥爲策應以致朱射斗失利陣亡以後魁倫愈加畏葸惟於鳳凰山紮營屢次奏摺總以防守潼河爲名從未與賊接仗適德楊泰遵旨帶兵馳到屢勸賊眾朕彼時諄諭魁倫以防守潼河是伊生死關頭特宥其縱賊渡嘉陵江之罪加恩降爲三品頂帶令其固守潼河以觀後效魁倫若果能實力堵禦俾德楊泰得於潼河以東將賊匪勦淨是魁倫前此疏縱之罪早經寬釋而防守潼河將功贖罪卽不能復還頭品頂帶仍可留任總督詎魁倫疏於防範經劉清稟請暫留黔兵以資防守又復批飭不

准致令賊匪竄過潼河西岸將完善地方百姓肆行殘害幾至擾及成都省城附近處所幸德楊泰督兵奮勦始將賊匪驅過潼河東岸彼時魁倫僅幫同勒保打仗一二次旋又帶兵前赴龍安川省百姓無不感激德楊泰而怨恨魁倫其展轉避賊惟怯無能若不加之顯罰何以肅軍紀而飭戎行且川西被賊黎民不可勝計此而猶欲曲事姑容豈無辜受害之百姓目不忍覩耳不忍聞者獨非民命乎因降旨將魁倫革職拏問交勒保等審訊擬以斬決經王大臣等復加覈擬無異本應卽將魁倫在軍前正法特因教匪究係內地亂民若將失律大員卽在該省辦理恐啓羣民蔑視官長之漸是以令其解京仍命王大臣等連訊兩日魁倫亦惟俯首認罪無可置辨且於圍勇誤殺解送弓箭之守備馬良柱一事並不據實奏聞轉將馬良柱捏報陣亡濫邀卹典其欺飾之罪亦

據供認不諱復經王大臣等照原擬請旨將魁倫卽行正法並遵
旨將從前軍營債事各員辦理成案六件檢查進呈以備比擬如
馬爾賽訥親張廣泗雅爾哈善俱經明正典刑此四人因勦辦準
夷金川回部外域較之魁倫情罪尤重至所開李侍堯則係原擬
斬決蒙 皇考改爲監候覈其原案止於不能豫防回匪致田五
等糾眾謀逆復株守靖遠不卽趕赴軍營以魁倫之畏葸退避縱
賊殃民與李侍堯相比情節更重至楊應琚任雲貴總督時因辦
理緬匪調度乖方捏飾欺蒙原擬照統兵將帥貽誤國事例擬斬
立決會蒙 皇考加恩賜令自盡魁倫身任總督與楊應琚同其
調度乖方亦與之同至於魁倫屢次以防守潼河入奏隱避其避
賊之計又於馬良柱一案捏詞具奏其欺蒙隱飾亦與楊應琚同
魁倫種種罪狀厯歷正法但究係自請前赴軍營其情尙稍有可

原魁倫著照楊應琚之例免其肆市著刑部堂官傳旨監視賜令
自盡乃於萬無可貸之中寬以一綫此卽朕過於姑息之處然於
軍紀所關斷不肯曲有一貽誤封疆之庸臣而膜視小民之被賊
戕害陷於非辜也魁倫之子完顏扎拉芬並著發往伊犁效力贖
罪以示懲儆特將辦理此案緣由通諭中外知之○撥浙江商捐
銀五十萬兩備陝西軍需○台斐音以貽誤軍務降調以溫承惠
爲陝西布政使王文湧爲陝西按察使由鳳陽道遷○乙亥申嚴赴京
越訴罪○丙子以戴均元爲內閣學士由詹事遷